

Marku

Deuxu Rybe Wihikỹ Tỹmyra, Marku Tyyritidỹydu

1 ¹Kaki heka Rybe Wihikỹ juhu kaki roire. Ka Rybe Wihikỹ Jesuisi Kristumy heka rarybereri. [Tii heka Deuxu Riðre rare.] ²Myheka Isaia tyyriti-ki kia rybe rỹire:

Deuxu rarybere: —Boholake, waõwàdàdu ariteònykre akomy. Tii ary riwinykre.

³ Tii ryrymyhỹ bederahy-ki: —Kai biwinykre rywihikỹ Wanyrỹ dee. Òbiti tamy biwinyke.

⁴Joao Sebedỹydu bederahy-txi taile ihỹmyhỹ rybe tyyriti ritỹnynymyhỹ. Tii sebenaõmy riòbitinymyhỹ. Kia riwinykemy ixi-txi tòhòti reakemy taðraru-txi kia Deuxu ritakemy. ⁵Ibutumy Judeia bede ludu mahãdu Jerusalẽ hãwã mahãdu-wana rare bederahy-ò. Taðrarumy relymy rahudi tahe, Joao risebenyre bero Jordaõ-ò. ⁶Joao rexityynre kamelo rade tyy-di, tule iròdutyy wereysana iwetya-ki roimyhỹre. Irỹsỹna raremyhỹ, seihikỹle bidi-wana. ⁷Joao rybe tyyriti ritỹnynydyỹmy rarybemyhỹ: —Jiarỹ aõ aõkõ rare, waruru-di aõkõ. Inyõ wahewomy kanakre tahe iruru waruru ratyredỹynadu rare. Waratyre awityhyke. Jiarỹ riwaixỹrunymy watxireri iwataana ese-ki. ⁸Jiarỹ bedi arãsebenyre. Tii heka Deuxu Tyytybytyhy-di arãsebenykre.

⁹Kiatxu Jesuisi nade Nazare Kalileia bede ludu-ribi. Joao tii risebenyre Jordaõ bero-ò. ¹⁰Tii bera-ribi dotuodeu biuwetyky rarayre. Deuxu Tyytybytyhy heka bòtòe wese tamy dobehede. ¹¹Deuxu rybe-ò roholare biu-ribi: —Kai heka Wariðre waluu tate. Adi wadeysawihikỹreri.

¹²Aõwesele Deuxu Tyytybytyhy heka Jesuisi riteònyre bederahy-ò. ¹³Tii bederahy-ki 40 txumy bede idi rỹire. Satanasi aõhòkỹmy risỹnymy Jesuisi raremyhỹ. Iròdu deborehekỹ tai rỹiramyhỹ. Yjureny iyrubudỹymy rehemynyre.

¹⁴Joao rare ròtenawo-ò, idita Jesuisi Rybe Wihikỹ ritỹnynykremy dehemynyde Kalileia-ò. Jesuisi heka Rybe Wihikỹ ritỹnynydyỹre: —Deuxu Iòlona bede-ò wahe. ¹⁵Jesuisi rarybera: —Bededỹynanahe

bede reara. Deuxu Iòlòna bedehé ìhòra. Kaiboho ixi-txi òhòtirený reake àòrarurený-txi bityhnybenýke Deuxu Rybe Wihiký.

¹⁶ Jesuisi aho ijàti-ki rariamy ihýmyhý. Tii robira tuurený taseriòre-wana ihýmyhý-ò, Simaõ Pedro, Andre-wana. Tiiboho rehomy ihýmyhýrený rià-di. Tiiboho heka waxidu roire. ¹⁷ Jesuisi rarybera tamyrený: —Kaiboho bodoibedenýke wahemy. Tai tahe araernanyrenýkre iny rimykemy utura temyta wese. ¹⁸ Tahe aòwesele rià ririrenýre. Roire Jesuisi-wana. ¹⁹ Iko roire Joaõ, Txiau, taseriòre-wana. Tiiboho heka Zebedeu riòre roire. Tiiboho hãworo-ki ratximyhýrený rià riywinymyhýrenýre. ²⁰ Jesuisi tamyrený rarybera: —Wahemy bòdòike. Tahe aòwesele tybyrený ririrenýre teòdu-wana. Tahe tiiboho roire Jesuisi-wana ierydýñnamý roirekemy.

²¹ Tiiboho rirònyrenýre Kafanaõ hãwã-ò. Judeu mahãdu aòmýsýdýñna txu aòkò. Jesuisi ralore judeu mahãdu dohodýñna heto-ò erydýñmy. ²² Kowa mahãdu urile bede riòtiinýre irýbe-ki. Tii heka irurutýhy-di rierynanyre, ierydýñdu mahãdu wese aòkò rohodýñnanymyhýre. ²³ Kia bedeu heka hãbu tyytybybina-di ratximyhýre dohodýñna heto-ki. Tyytybybina hãbuwo-ribi rarybere: ²⁴ —Aòhebo wadi botýñnykre Jesuisi Nazare ludu. Biwahubenýkre aòbo? Jiarý araeryre mobo kai tatehe, kai heka hãbuòtyhy inatyhy Deuxu-ribi kai tate. ²⁵ Jesuisi tarurumý rarybere: —Kai rybeòmyke. Iribi bòhònyke tyytybybina. ²⁶ Tyytybybina hãbu riatyre riworýsýworýsýnylemy. Tyytybybina rýryre rybe iteremy, idi ròhònyre. ²⁷ Ibutumý iny ribedeòtiinýre. Ritýñraxinýre ijò: —Aòwexe ratxireri, aòerydýñnatýmyrabo ratxireri. Tii riteònyre tyytybybina. Tyytybybina Jesuisi rityhnyre. ²⁸ Ityhynina Kalileia bede bedemy reare.

²⁹ Tahe dohodýñna heto-ribi ròhònyrenýre. Jesuisi, Txiau, Joaõ-wana roirenýre Simaõ, Andreboho heto-ò. ³⁰ Simaõ riòre lahi roimyhý rubunamy. Tahe aòwesele tuu relyyre Jesusiko. ³¹ Jesuisi rimyre tebò-ki, tahe, aòwesele irubuna ixãwira. Idi tahe hãwyy tamyrený bede redere.

³² Txu ralòmý rahudi, ibutumý tamy didydenýde inybina bina. Tule iny tyytybybina tamy didydenýde. ³³ Ibutumý iny hãwã ludu iheto ijò wirotýre. ³⁴ Tii ibutumý binana òta òta riywinýre. Sòwemy tyytybybina riòlòdýñnyre. Tyytybybina Jesuisi rierymyhýre. Tai tahe Jesuisi riijònyre tyytybybina rarybekeò.


³⁵ Rudile Jesuisi rare bederahy-txi rexitòenykremý. ³⁶ Simaõ, ijò mahãdu-wana Jesuisi ijesetyhymý roire. ³⁷ Tiiboho Jesuisi raharenýre. Tamy rarybere: —Ibutumý iny arãjjereri. ³⁸ Jesuisi tamyrený rarybere: —Rokoikehe rekexinoranyrenýke hãwã witxira-ò. Jiarý tamyrený rybe tyyriti aritýnnykremý. Iurenana tahe jiarý anade. ³⁹ Jesuisi rare ibutumý Kalileia bede-ò. Tyytybybina iny-ribi riteònyre. Tule dohodýñna heto-ki tii rybe tyyriti ritýnnyre.

⁴⁰ Hãbu tybina mahãduò Jesuisi-ò nade. Tii tatiowotimý resere Jesusiko-ò. Tahe Jesuisi-ò hãbu rarybere: —Adee awikeki tahe, biwateytenýke. ⁴¹ Jesuisi juhu urile riwotòenyre. Tii hãbu ritorunýre. Tahe rarybere: —Wadee awire, atyy awimý relekre. ⁴² Tahe aòwesele ittybina reytera. ⁴³ Jesuisi hãbu riteònyre. Rarybere: —Kai tahe inyòdee rybeòmykre. ⁴⁴ Kai bexiteòsinykre Deuxu aòmýsýdýñdu-ò.

Iwese Moisesi ròerynadỹnyre wese, kai bexiteòsinykre. Kia heka inydee deòsinamy riteòsinyre. Kia iny rieryke timybo teytemy atximahãtemy. ⁴⁵ Tahe hãbu rare ibutumy inyko relyyra. Kia heka Jesuisi tahe uritere hãwãhãkỹõ-ò ralòòhyyre. Tahe bederahykile rarire. Ibutumy iny tamy rare ibutumy bede bede-ribi.

2 ¹ Tiutxuõmybo Jesuisi dòòsede Kafanaõ-ò. Idi tahe rybe reare rehemynymy ratximyhỹ heto-ki. ² Tahe iny, aõriòre aõkõ, tamy wirotyre heto ijò-ò. Tahe Jesuisi relyymyhỹ Deuxu rybemy. ³ Hãbu inaubiòwa heka hãubina-di tamy detyydenyde. Kia hãbu rawòronyre taumy-ki. ⁴ Jesuisi-ò rehemynyõhyklere iny sòwerekì. Tahe raòwònyrenyre idi heto ratyytyre-ò. Hetotyre riraynyrenyre tahe reru-di diberesedỹnydenyde byretyre-ki Jesusiko-ò. ⁵ Jesuisi rieryre hãbu rityhynyrenyre, tai rarybere hãubina-ò: —Waexi aòraru-ribi araxitarasadỹnyre. ⁶ Bede ywina erydỹ mahãdu rorukurenryeri, ixideele rarybemy rỹimyhỹre: ⁷ —Aõherekibo hãbu kiawese rarybereri. Tii iòwe òwelemy rarybereri. Deuxu dee aõbina binalemy rarybereri. Mobo tahe òraru-ribi iny ritake. Deuxule òraru-ribi iny ritake. ⁸ Jesuisile roholaòlere ihãrele rieryre aõmybo raryberenyre. Tai tahe Jesuisi tamyreny rarybere: —Aõherekibo kiawese tarybetenyteri. ⁹ Tibohe isiraõtyhyre, tuu ararybeke: —Aòraru-ribi anaixitarasadỹnyre ada myike, abyre bimyke, mariake. ¹⁰ Kaiboho bierykemy Deuxu Riòre Hãbutyhyhykỹ irurudire iny òraru-ribi iny ritakemy. ¹¹ Tahe hãubina-ò rarybere: —Boholake, myike, abyre bimyke tahe makre aheto-ò. ¹² Tahe hãbu rỹire, tabyre rimymy tahe rare ibutumy inyru-ò. Ibutumy bede riòtiinyre tahe reàlãre Deuxumy. Ibutumy rarybere: —Tiu heka aõmy kawese rabiõhyymyhỹre.

¹³ Jesuisi rare ahohokỹ ijã-ò. Ibutumy tamy doide. Tii iny ribedeerynre. ¹⁴ Levi, Afeu riòre, ronymyhỹ nierumynydu hetowo-ki.



(Marku 2.1)

Jesuisi ibire-di rareò, tii robira. Jesuisi heka Levi-ò rarybere: —Waijoimy mynake. Tahe r̄yimy reare Jesuisi ijoi-ò ralore.

¹⁵ Jesuisi taeryd̄ȳna-wana rorukure Levi hetowo-ki. Tule nierumynydu mahāduō ronymyh̄re òrarudu-wana. Ibutumy riroximyh̄renyre. Sōwemy heka kia iny mahādu Jesuisi riheludunyrenyre. ¹⁶ Bede ywina eryd̄ȳ mahādu, lahi rybe-di eryd̄ȳna mahādu tuu robirenyra. Idi raryberenyre Jesuisi eryd̄ȳna mahādu-ò —Aōherekibo tii riroxireri òrarudu-wana, nierumynydu-wana. ¹⁷ Jesuisi roholareu, tamyreny rarybere: —Iny ibinaōkeki tahe luahidu tamy kanaōtyhy. Tahe iny ibinakeki, tamy kanake bina-ò. Òbiti mahādu itxemy aōkō anade. Tahe òrarudu mahādu itxemy anade.

¹⁸ Joaō eryd̄ȳna mahādu, lahi rybe-di eryd̄ȳdu mahādu-wana byreōhyky txuu tutyhyle r̄ymyh̄renyre. Tahe roire Jesuisi d̄ȳraxid̄ȳmy. Inyō Jesuisi rit̄ȳraxinyre: —Aōherekibo Joaō eryd̄ȳna mahādu byreōmy r̄ȳiōmyh̄re. ¹⁹ Jesuisi rirawyònyre: —Heriduō, itxeredu-wana ratxireriu, byreōmy r̄ȳiōtyhy tutyhylemy. ²⁰ Tiutxulemybo tahe heridu iribi kanatakre, tai tahe byreōmy k̄nyikre tutyhylemy. ²¹ Moheka tyyt̄myra dōbōna ritidikre tyytyby-ò. Idi inatyhymy dōbōna rayjakre tahe tyytyby sōwemy raykake. ²² Moheka òteti bederatyrube t̄myra rihynymyh̄re iròdutyy walabuutybywo-ò. Idi tahe raberyr̄onymyh̄reu, urile iròdutyy walabuu raykake tahe irube rejujuke. Tule iròdutyy walabuu ribinad̄ȳnymyh̄re. Irubet̄myra awire heka iròdutyy walabuu t̄myrarokile.

²³ Judeu elehyd̄ȳnareny txu Jesusiboho ririranymyh̄renyre maixōmo wesena oworomy, tai ieryd̄ȳna riòr̄omyh̄renyre riroxirenykemy. ²⁴ Tahe lahi rybe-di eryd̄ȳdu mahādu rarybere Jesuisi-ò: —Aōherekibo aeryd̄ȳna mahādu riwinyreri aōwid̄ȳna aōkō karare sabado txu. ²⁵ Tahe Jesuisi tamy rarybere: —Kaiboho aōbo teriranyōletenyta tyriti-di. Iwese Daviboho-wana aōhebo rot̄ȳnyreri aōmy rekoarenymahāu, rama rahumyh̄renyu. ²⁶ Tii ralore hetotyhy-ò. Tai tahe orotxu sira ybina riyre, tule tamahādu-ò riwahinyre. Kia tahe Deuxu deòdule rir̄s̄ymyh̄re. Kia Davi aōhebo rot̄ȳnyre Abiata heka Deuxu deòdu wedurau. ²⁷ Jesuisi tamyreny rarybere: —Sabado txu heka rawid̄ȳre inydee, iny tahe rawid̄ȳōre sabado txu dee. ²⁸ Deuxu Riòre Hābutyhyhyk̄y tahe sabado txu wedu rare.

3 ¹ Ixityre Jesuisi ralore dohod̄ȳna hetowo-ò. Hābu debò binahak̄yō tai ratximyh̄. ² Lahi rybe-di eryd̄ȳdu mahādu Jesuisi retehemyh̄renyre. Jesuisi sabado txuule riteytenykeki, tiiboho rarybekemy aōbinabinakibo raharenkemy Jesuisi. ³ Jesuisi heka hābubina-ò rarybere: —Manake. ⁴ Tahe Jesuisi ijō mahādu-ò rarybere: —Aōwihik̄ywid̄ȳ awire ada aōbinalemy wid̄ȳ awire. Tibohe awire, itarasa-ki aōbo ada rubu-ki aōbo. Hābu mahādu urile riyryre. ⁵ Jesuisi tamyreny retehere raōbinamy. Tii heka iaōna aōna riwot̄enyrenymyh̄. Jesuisi hābu debò bina-ò rarybera: —Ebò biterenyke. Tai tebò riterenyreu, aōwesele awimy relere. ⁶ Lahi rybe-di eryd̄ȳdu mahādu rara Iòlò Herodi mahādu-ò. Tiiboho raryberenyre timybo tahe Jesuisi rirubunyrenyke.

7 Jesuisi rexitare taerydỹyna mahãdu wana aho-ò. Tahe sówemy iny Judeia mahãdu, Kalileia mahãdu riheludunyre. 8 Ibutumy aõna aõna roholare Jesuisi riwinyreò. Tahe sówemy tamy nade: Jerusalẽ hãwã mahãdu, Idumeia hãwã mahãdu. Iny Jordaõ bero ijã-ribi tule nade. Tule iny Tiro hãwã, Sidõ beà hãwã-ribi iòhõmy tamy nade. 9 Tahe Jesuisi taery mahãdu-ò rarybere: —Walawò bidiwykre. Iny sówemy dori rehemynyreri. Kidiwawotõmonykre òsana. 10 Ibutumy bina mahãdu ibymy tebò rearerer i xideytedỹymy. Urile iny sówemy riywinyre dori. 11 Tyytybybina Jesuisi reteherenyre, urile iko-txi resere ryreri: —Kai Deuxu Riõre tate. 12 Tai tahe Jesuisi rarybere tyytybybina-ò, uritere iteòsidỹyõmykemy.

13 Tii raòwõnyre bederatõomy. Tahe taerydỹyna-ò raryre tibo tamy reòbykemy. Tahe tamy nade. 14 Tahe ierydỹyna waòinatxi reurõmy rarunyre tii-wana rarekemy, rybe ritỹnyndỹykemy. 15 Tule iruru-di rarekemy inybina riteytenykemy. Tule irurudikemy tyytybybina riteònykemy. 16 Kie ierydỹynanirenyre: Simaõ, (tii tahe Jesuisi ijõni riwahinyre, Pedromy) 17 Txiau ijõ, tii Zebedeu riõre rare. Kia seriõre Jesuisi rininirenyre, Boanejimy, inirenyre. Kia heka irybereny rare, Biumytxy riõrenyre. 18 Ijõ heka Andre, Filipi, Bartolomeu, Mateu, Tome, Tadeu, Txiau. (Kia Txiau heka Afeu riõre rare.) Ijõ Simaõ iwitxira, (tii brebuõmy rybe-ki, tasubedeluudu wahe.) 19 Judasi Isariõ ijõre, kia heka Jesuisi riwahinyre iòludu-ò.

20 Tahe Jesuisi nalode taheto-ò. Ixityre iny sówemy tamy nade. Tai tahe Jesuisi taerydỹyna-wana riroxiõhyre. 21 Idi tahe Jesuisi leinarenyre itxỹtesana roholarenyre, riõryrenyre. Tiiboho raryberenyre: —Jesuisi itxỹte iòhõlere. 22 Bede ywina erydỹy mahãdu doide Jerusalẽ-ribi rarybemyhỹrenyre: —Belisibu idi ratximyhỹre. Tyytyby wedu ruru-di tyytybybina iny-ribi riteònyrereri. 23 Jesuisi inyko ijyymy relyyre: —Timy taheka Satanasi rexiteònykre Satanasi. 24 Iòlõna wiribi rexihitxinykeki tahe, rexihukre ibutumy wiludu. 25 Tahe sýro luduõ wiribi rahitxikeki, rỹiõtyhy. 26 Satanasi rỹikeki reburemy, tii ixiòbitile rexirubunye. 27 Inyõ heka hãbu rurutere hetowo-txi ralòõtyhy. Tai rawasinykeki, urile iny ritaataake. Urile hãbu rataataakeki, iròòbymy iny rawasinyke. 28 Inatyhy jiarỹ adee ararybereri, ibutumy òraru heka kanaixãwidinykre hãbu dee aõtxile aõbina binamy rarybemyhỹre. 29 Kia inyõ aõtxile aõbina binamy Deuxu Tyytybytyhymy rarybekeki, tiu heka iòraru rataõtyhy. Kia òraru riwinyre tiiehymy rarekemy. 30 Jesuisimy kiamy narybedenyre: —Tii heka tyytybybina dire.

31 Tadi tahelỹyna-wana nade. Tahe ahanakile ritamanyre. Tamy riteònyrenyre iòrysmy. 32 Iny sówemy iwerora-di ronyre. Tahe Jesuisise-ò rarybere: —Adi aseriõre-wana ahanakile nyide, arajereri. 33 Jesuisi rarybere: —Mowe nadi rare, waseriõreboho rare. 34 Juhu urile idi retehereri iwerora-ki. Tahe rarybere: —Betehekere, kaiboho ibutumy kaki nadiwesere, waseriõre wese toite. 35 Inyõ aõna aõna riwinymyhỹkeki, Deuxu dee awira. Kia heka nadi, waseriõre roire.

4 1 Jesuisi ròðsera ahobero ijã-ò iny dohodỹymy. Sówemy iny wirotyre. Tai Jesuisi ronyre hãworo-ò tahe rexitaranyre ahoro-ò. Aho ijã-ò iny wirotyre ijohonamy. 2 Tii aõna aõna sówemy roerydỹynanyre ijytyhydile. Kaa ijyymy tii relyyre: 3 —Boholake, alòbòrõna-di dehudu

rara alòbòrònamy. ⁴Alòbòròna-di rehumyhÿu, ijõ ryro-txi resere. Tahe nawiixõmo rirore. ⁵Ijõ rejujure manarutàsü-txi. Tahe aõwesele raumynyre iraruxiõlemy su dori ibutere. ⁶Irauxiõreki, bede tõeete alòbòròna rimoenyre idi rurura. ⁷Ijõ oworuty resere edehu-txi idi ruhunyre edewanale. Tai tahe ede-ò riòdesenyre tai raratynyõlere. ⁸Ijõ resere su wixira wihikÿ-txi. Kia tahe raumynyre. Tahe sohoji oworutyõ 30my iraty raratynyre. Ijõ oworuty 60my raratynyre. Ijõ tahe 100my raratynyre. ⁹Tii rarybera: —Kaiboho aõbo õhõtidiirenyre, inatyhymy warybe-ò boholaake. Adeewikeki, bierybenyke.

¹⁰Iny robÿtÿreu, ijõ rarilere ierydÿÿna mahãdu-wana. Tiiboho rÿÿraxire Jesuisi-ò: —Aõhekemybo telyyta ijyymy. ¹¹Jesuisi tamyreny rarybera: —Deuxu lòlòna rybemy Deuxu araerynanykre. Kia heka tuu teeryõmahãte. Kowaboho-ò jiarÿ urile ijyymy relyyra. ¹²Tai tahe kia wesele relyyra.

Iny retehemyhÿkemy tahe robiõhyymyhÿre. Roholamyhÿre ta, rieryõhyymyhÿre. Tai tahe ralòkemy aõkõ, taòraru riixãwididÿÿnakemy aõkõ.

¹³Tii tamy rarybere: —Kaiboho aõbo teeryõhyyletenyteri ijyy. Ihãre tahe timykibo bierybenyke ijyy ibutumy. ¹⁴Aloborodu rehumyhÿ alòbòròna-di. Kia oworuty heka rybe wese rare. ¹⁵Oworuty riyjãti ludu heka iwese urijjohonadu wese heka rare. Rybe-ò roholarenyre, Satanasi nade rybe iwo-ribi ritakremy. ¹⁶Manarutàsü ludu iwese iny reysamy roholareri. ¹⁷Iny urihimyoõle rarorehenymyhÿre iraruxi sõeõreki. Idihe rasirara irybe. Tule iny ralahatxinamyreki, ihÿyle tahe riixãwidinyra. ¹⁸Ede rawo ludu iwese iny wixira roholareri. ¹⁹Tiiboho taaõmydÿÿnadile røhõtinyinmyhÿre. Sõwemy nieru-di ratkikemy rexinohõtinyinmyhÿre ta nieru riitxenanymyhÿre. Ijõ aõna aõnadile rexinohõtinyinmyhÿre. Kia aõna aõna rybe rirarutxinymyhÿre. Tai tahe rybe raratynyõmyhÿre. ²⁰Suwihikÿ ludu iwese iny wixira roholareri. Kia inatyhymy rÿireri heka raratynyre alòbòròna raratynyre wese. Ijõ raratynyre 30my, ijõ tahe 60my raratynyre. Ijõ tahe 100my raratynyre.

²¹Tii rarybera tamyreny-ò: —Uritere loosõna ideõmyke butxi worawo-txi ada herina raworawoõ-txi aõbo. Loosõna bidekre bedewiõ-ò. ²²Inyõ iwõteõmy aõna aõna tiiehyymy. Tiutxulemybo ratÿnykemy ihÿre. Iwõteõmy atximahãbenyke aõu bodobikemy atximahãtenyete. ²³Kaiboho aõbo õhõtidiirenyre, inatyhymy boholaake. ²⁴Tahe Jesuisi tamyreny rarybera: —Kaiboho inatyhymy boholaabeny tamy taholamahãtenyete. Urihixina iwese teõteri wesele, kai biwykre. Ihãre tahe biwykre ijõ teõta-ribi ritamy. ²⁵Hãbuõ ijõdiikeki tamyle rawahidÿÿke, tahe hãbuõ ijõõkeki iribi ratatyhyke.

²⁶Jesuisi relyyra kia ijyymy: —Deuxu lòlòna kia ijyy wese rare. Hãbu rehumyhÿre alòbòròna-di suò. ²⁷Hãbu rummy rørømyhÿre txulemy rexixamyhÿre. Tii rieryõlemyhÿre timybo alòbòròna ratybiennyemyhÿre. ²⁸Suu ixi dee sohojile raratymy. Juhuu iõle ramyhÿre. Idi tahe raratynymyhÿre, ihewonau, tahe, iraty rasõnymyhÿre. ²⁹Bederaty rasõnymyhÿreu, iyresydu riteõnymyhÿre. Mayrabu-di riørøkemy bederatysò butudÿÿna dori rexihumyhÿre.

³⁰Tii rarybera, Deuxu Iòlòna wexe aõwesere. Aõ-ò wexe rikioirenykre. Tiwexe ijyy kawesere. ³¹Kia heka mostardaty wesere. Tii heka iylatyhmy ratximyhÿre kabede-ki. ³²Tahe tii raumynymyhÿre wana, ireitòbòròdÿÿ ratyire rarururunymyhÿre. Tahe nawii tamyle rasÿnymyhÿre. Iubòròrò rawolemy taheto riwinyre.

³³Tahe Jesuisi Deuxu rybemy rierynanyimyhÿre. Kia ijyy wese sõwemy ijyy rierynanyimyhÿre. Kialemy iny-ò Jesuisi relyymyhÿ ibutumy tamy reny ritynynymyhÿreki. ³⁴Kia-ò riòbitinyòlere ijyyò. Tahe iny-ribi irehemy taerydÿÿna-ò riòbitinyre.

³⁵Iu txu txiorolemy Jesuisi rarybere taerydÿÿna-ò: —Rikiòhòrenenyke kowa weribi ijà-ò. ³⁶Sõwemy iny rarire aho ijà-ki. Tahe taerydÿÿna tamy ralore. Roire hãwò-di. Tahe ijò hãwò idi ratximyhÿre. ³⁷Tahe bede binahakÿ rexidelenyire yhmy. Tahe òbò hãwò rihãtenymyhÿ tai ritÿmynykemy ritelenyire. ³⁸Tai tahe Jesuisi ròròmy roimyhÿ tòro-ki irati tarahynatyre-ki. Tai tahe riixixanyre. Ijò rarybere: —Waerydÿÿdu, adeehe awimy aõbo iny ituerenykre. ³⁹Rexixamy Jesuisi. Tii yhy riixãwididÿÿnyre. Tii ahohokÿ-ò rarybere: —Biyryke! Tai bede ruhuwihikÿre. ⁴⁰Tamyreny rarybere: —Aõherekibo kaiboho taberutenyteri? Deuxu aõbo tetyhynyõmahãtenyete? ⁴¹Tai tahe tiiboho bede riòtiinyrenyira. Tahe widee raryberenyre: —Mowexe tuu yhy ahohokÿ-wana irybe riywinyke.

5 ¹Ritehemynyrenyire ijò berohokÿ weribi ijàna-ò. Kowa heka ibutumy hãwãhãkÿ Kadarena inirenyre. ²Jesuisi hãworo-ribi resereu, hãbu tyytybybina-di robire ròhònyreri wabede-ribi. ³Kia heka tiemy rasÿnymy raremyhÿ wabede-ki. Katahe wiji moheka womati reroti-di rataataaõtyhy. ⁴Aòdorihe òhòore tebò iwa rataataare womati reroti-di. Tiemy heka rimoenymyhÿ. Teòruty ludu tawararu ludu tule ritòtynymyhÿre iyresymy. Moheka iruruõre iny erydÿÿmy. ⁵Txuu ruu-wana heka tii rasÿnyre wabedewo-ki. Tii rariamyhÿre bederatòðmy. Tule rirajuamy tai rexihãtenyire mana-di. ⁶Tai tahe Jesuisimy robireu, tii rajjaranyre Jesuisi-ò. Resere tatiowotimy Jesuisiko-ò. ⁷⁻⁸Jesuisi tyytybybina-ò rarybere: —Iribi bòhònyke. Tahe tyytybybina rarybera: —Aõwe wadi tate. Kai, Jesuisi, ibutumy inyò dee inyrateyrate. Kai Deuxu Riòre tate. Lãhãmy lãhã, uritere aõbina binahakÿmy wahòròdÿÿòmykre. ⁹Jesuisi ritÿÿraxinyre: —Mobohe anire. Tyytybybina rirawònyre: —Wanireny sõwetyhyre wasõwerenyreki. ¹⁰Urile karibi wateòdÿÿrenyõmykre. ¹¹Tahe kowa-ki ixÿni juramy riroximy rÿimyhÿ bederatòð-ki. ¹²Ibutumy tyytybybina rexitòdenyrenyire: —Biwateònybenyke ixÿni jurawomy aralòrenykemy. ¹³Tahe Jesuisi riteònyre. Tyytybybina aõwelese ròhònyre tahe ixÿniwomy ralore. Ixÿni jura tahe raòrunyire rejuxunyire ijòtira-ribi. Berawo-txi tahe rabòròròre ahohokÿ-ki. Inatxi mil ixÿni rabòròròre. ¹⁴Ixÿni-di itxeredu reare ijyyimy ibutumy hãwã hãwãmy relyyrenyire. Tahe iny dirahude tamy itxeremy. ¹⁵Tiiboho Jesuisi-ò doideu, tuu robirenyira hãbu tyytybybina-di raremyhÿ. Tii rexityynymy ronymyhÿre. Tii heka òbitimy ròhòtynymyhÿre. Tai iny mahãdu rabedeòtiidÿÿnyre. ¹⁶Tiiboho tuu robirenyire, ijò-ò relyyrenyire ixÿni ijyyimy,

timybo aõhebo rotÿÿnyremy hãbu tyytybybina-di ratximyhÿre. Tule relyyrenyremy timybo rotÿÿnyre ixÿni jura. ¹⁷Iny rexitõenyre Jesuisi-ò rexitakremy isureny-ribi. ¹⁸Jesuisi hãworo-ò ralore. Tahe hãbu tyytybybina-di ratximyhÿre, rexitõenyre Jesuisi-wana rakemy. ¹⁹Tahe Jesuisi idy derare. Tamy rarybera: —Mahe asÿ-ò, aijoi-ò belyyke aõna aõna Deuxu adee riwinyremy, iwese tii araruxetõenymyhÿre wese. ²⁰Tahe hãbu rare Debõwiò hãwãreny-ò. Ibutumy Jesuisi aõna aõnamy ixidee riwinyremy relyyre. Ibutumy iny ribedeõtidiÿÿnymyhÿre.

²¹Ixityre Jesuisi rare ahohokÿ weribi jã-ò. Ixidee iny sõwemy ributunyre. Tii heka ihÿmyhÿ ahohokÿ jã-ki. ²²Tahe dehemynyde tamy dohodÿÿna heto weduõ. Ijairu inire. Tii Jesuisi robireu, resere tatiowotimy iko-txi. ²³Ijairu rarybere Jesuisi-ò: —Wariõre irubu iòhõtÿhylemy roireri. Kai manakre tamy ebò bitidikremy. Tai awimy relekre, ruruõtÿhy. ²⁴Tahe Jesuisi tii-wana rare. Iny sõwemy tule rare iòhòkile tamy rÿire.

²⁵Kia heka hãwyyõ binamy ramyhÿre. Ihãlubu rejuxunymy raremyhÿ. Beõra waõinatxi reurõmy rejuxunymyhÿre, rihuõhy raremyhÿ. ²⁶Tii aõhòkÿmy rotÿÿnymyhÿre sõwemy õhotibedu mahãdu-di. Tahe awimy rotÿÿõlemyhÿre. Urile tanieru ibutumy rahure õhotibedu mahãdu-ki. Awimy releõlemy, ire bede-ò resere. ²⁷Tahe roholare Jesuisi nina-ò tahe iòhò-ki nade inyy-ki. Idi ihewo-ribi rimyra itynora-ki. ²⁸Hãwyy ixidee rarybemyhÿre: —Krile itykynora-ki karimyekeki, karekyteke. ²⁹Tahe aõwesele ihãlubu ijera ixãwire. Ixidee awimy rõtõtinyre. ³⁰Jesuisi rieryre iruru iribi rõtõtinyremy, tai rarybere: —Mobo watynora rimyra. ³¹Tahe ierydÿÿna raryberenya aõherekibo tuu tarybeta ibutumy taheka iny abirelemy rÿireri. ³²Jesuisi rethemyhÿre urile mobo rarekemy. ³³Hãwyy rierymyhÿ aõhebo rotÿÿnyre. Tii ruberumy Jesusiko-ò resere relyykemy iko. ³⁴Jesuisi rarybera: —Lerÿ, atyhydÿÿna kÿnyhe aratara. Mahe, kai dori textiywinyta.

³⁵Tii rarybemyhÿò, dohodÿÿna wedu deõdu rehemynyrenyneri. Tiiboho raryberenya: —Wawedu, Ijairu, ariõre rurumy roireri. Aõmybo tahe Erydÿÿdu-di atxiteri. ³⁶Jesuisi kia-ò roholara tahe rarybera dohodÿÿna wedu-ò: —Brebuõmy, urile bityhynykre. ³⁷Jesuisi-wana roire, Pedro, ijõ Txiau, ijõ Joaõ. Joaõ heka Txiau seriõre rare. Kaõle heka reõbyre tii-wana rakemy. ³⁸Dohodÿÿna wedu heto-ò dehemynydeu, ixiyjadÿÿ-ò roholara, robureriò, rirajuareriò. ³⁹Jesuisi ralore tahe rarybera: —Aõherekibo tabutenyteri. Hiraririkÿ rurumy aõkõ roireri. Tii urile rõtõtineri. ⁴⁰Juhu urile tai rutxuenyrenya Jesuisi-ki. Tahe Jesuisi ibutumy iny riòlòdÿÿnyra hetowo-ribi. Tahe ise, tybyle, ixidee rimyrenya ratxirenkemy. Tahe tamy rirõnyrenyremy tai hiraririkÿ roimyhÿò. ⁴¹Jesuisi hiraririkÿ debò rimyre tahe rarybera: —Talita kumi. (Katahe iwitxira rybemy rarybera. Kiamyneri heka, mynyikemy.) ⁴²Aõwesele hiraririkÿ rÿimy reara. Tahe rariara aõmyreki iwya waõinatxi reurõmy iwyrumy. Tahe urile bede riõtitiinyrenyremy. ⁴³Jesuisi riteranyre moõ rierydÿÿkemy aõkõ. Jesuisi tule rarybere: —Rÿsÿna tamy biwahynykre.

6 ¹Jesuisi dexitade kowa bede-ribi. Tahe tauladu tybiena hãwã-ò dehemynyde. Taerydÿÿna mahãdu riheludunyre. ²Sabado txumy rierynanyre dohodÿÿna

heto-ki. Sōwemy iny roholamy r̄ĩmyh̄y bede riòtiiny. Tahe rarybere: —Tiribibo kia hābu aōna aōna bede rierye. Aōbedeeryhyk̄ybo ratximyh̄y. Timyta heka bedeòby riwinyre. ³Kia aōbohe aōwid̄ȳdule ratxireri, Marie riòrele. Tiiboho aōbohe Txiau, Jyje, Judasi, Simaō, seriòrebohohole ratxirenyreri. Ter̄yboho aōbohe tule kakile ratxireri. Ibutumy iny heka Jesuisi derarenyre. Irybe rityhynyōre.

⁴Jesuisi rarybere tamyreny: —Deux rybed̄ȳdu heka tyhyd̄ȳna ritaōlekre tahāwāreny-ribi, tajoi-ribi, tas̄y-ribi. ⁵Tahe Jesuisi kowa-ki bedeòby riwinyōlere. Urile tebò ritidire inybina bina tyre, taile riteytenyre. ⁶Jesuisi urile bede idireny riòtiinyre rityhynyōlemyh̄yrenyeki. Tahe Jesuisi reurore hāwā hāwā-di eryd̄ȳmy.

⁷Tii ixidee ributunyre tawaðinatxi eryd̄ȳna mahādu. Tii riteònyre inatxi inatxi iubyt̄nyre. Tamyreny taruru-ribi riwahinyre tyytybybina deòd̄ȳki.

⁸Jesuisi tuu rarybere: —Urile biwykre adebòna. Uritere orotxu aōkō, nieruhyna aōkō, nieru wereysanawo-ki aōkō, iwydysyrenyōmykre. ⁹Uritere waubehetyōmy noōmykre. Uritere inatximy wirawomy tyy-di ixitydȳyōmykre.

¹⁰Hāwā-txi malòkeki, tiemy taile bonykre tiubedemybo iribihyyle bòhònykre.

¹¹Titxi behemynybenykeki, uritere iny erarenymy reakeki, roholaōkeki, txiòrare, urileta awareny bitòtynykre bede erynamy. ¹²Tahe tiiboho roire. Rybe rit̄nydȳmyh̄yre iny ixidee rexirahirenykemy. ¹³Tyytybybina irehemy iny-ribi ririradȳnykemy. Sōwemy inybina tyre òlyre ritxiwire. Tai tahe riteytenyre.

¹⁴Kia heka iòlò Herodi roholara. Jesusini dori erynatyhymy raremyh̄y. Tahe ijòboho rarybemyh̄yreny: —Joaō Sebed̄ȳdu rexixara rubu-ribi. Ijò rarybemyh̄yreny: —Eliale ratxireri. ¹⁵Ijò rarybera: —Deux rybed̄ȳdu ratxireri. Deux rybed̄ȳduò wese heka ratxireri. ¹⁶Herodi roholareu aōbo Jesuisi riwinyreu, rarybera: —Kia hābu Joaō ratxireri. Kia heka irati reorore heka rare.

¹⁷Kia heka iòlò Herodi riteònyre imynamy. Idi tahe ritisanyre ròtenawo-ò. Taseriòre hāwyy òraru-ki kia riwinyre. Filipi iseriòreni rare. Iseriòre hāwyyini Herodia rare. Herodi, Herodia-wana roire iseriòre riòrese-wana. ¹⁸Juhuule Joaō rarybere Herodi-ò: —Kai aōkòre aseriòre hāwyy-di mabeòtyhy. ¹⁹Herodia tamy iky reamyh̄y rirubunyky ratximyh̄y tahe aōkòhyylere. ²⁰Herodi tahe Joaō rityhynyre. Tii rierymyh̄yre Joaō hābu wihik̄yō ratximyh̄y. Tai riyrubunyre ròtenawo-ki. Herodi Joaō roholareu, urile bede riòtiinyre urile roholawihik̄yre.

²¹Kia txuu ibeòra reare Herodi lisina berenamy riwinyre. Tahe ibutumy hāwā dinodu, soldado wedu mahādu, tule ibutumy hābu ninihik̄y Kalileia mahādu-ribi rihuòtere. ²²Ijadòma ralore resere, Herodia riòre. Herodi, iny huòtedu mahādu-wana tamyreny awire. Iòlò ijadòma-ò rarybera: —Aòtxile aōma wadee bexitòenyke, adee ariwahinykre. ²³Inatyhymy adee ararybekre. Waaōna aōna iweeremy bexitòenykeki, adee ariwahinykre. ²⁴Ijadòma tadi rit̄ȳraxinyre aōmybo tahe tamy rexitòenykre. Ise rarybera: —Joaō Sebed̄ȳk̄ydu rati kai bexitòenykre. ²⁵Tahe ijadòma ròsere iòlò-ò. Tahe ijadòma rarybera: —Joaō Sebed̄ȳk̄ydu rati kai biwahinykre hyna tyre-ki. ²⁶Iòlò sōwemy rabadewore irybe-ki. Rexitxiònyōlere iny dori sōwemy ibire-ki. ²⁷Iòlò soldado rariare Joaō rati òrysmy. Tahe irati riorore ròtena-ki. ²⁸Tahe irati diwyde besetyre-ki.

Ijadòma-ò riwahinyre, tahe ijadòma tadi-ò riwahinyre. ²⁹Joao erylđyřna rieryreu tahe, nade iumy òrysomy. Tahe iumy riwyre wabede-ò.

³⁰Jesuisi erylđyřna mahādu ròðserenyre Jesuisi-ò. Tahe relyyrenyra ibutumy aòmtyđyřnana tule ibutumy rierynanymyhỹre. ³¹Jesuisi tamy rarybere: —Inyboho sohojile rokoireny bederahy-txi ixielehydỹmy. Tii dori rarybera tamy heka byrena iòhòtyhyòlere tamy roxina raðhòlere. Iny sòwemy tamy wii reutydynyri. ³²Tahe tiibohe sohojile hāwò-di roire bederahy-txi inyò-ò. ³³Iny sòwemy tuu robira ròhònyrerimy. Tahe iny ibutumy hāwā hāwā ludu rajjaranyre tòròsòna-ò. Tiibohele juhu rehemynyre iko-ki. ³⁴Jesuisi rororeu, tahe inymy sòwemy robire, riraðrerìò. Jesuisi tamy ratòdenymyhỹre. Tiibohe dori iwese budoeni idi itxereduòmty řyriery wesemy. ³⁵Txuu raloreu, ieryđyřna mahādu Jesuisi-ò roire. Tiibohe rarybere: —Ka kỹnyhe bederahy roire txuuke rexihura. ³⁶Kai tahe iny biteònykre hāwā hāwā mahādu-ò rỹsỹna ixideereny òbradỹmy. ³⁷Jesuisi tamyreny rarybera: —Kaibohe tamy rỹsỹna biwahinykre. Tahe raryberenyre: —Timybo tahe inyboho 200 prata womati nieru-di orotxu rikiòbranyrenykre. Timy wexe tamyreny rỹsỹna rikiwahinyrenykre. Jesuisi tamyreny rarybera: ³⁸—Tiwese orotxu bohe řyire. Maa tamy itxeremy. Idi tahe rieryrenyreu, rarybera: —orotxu iruyre, utura inatxi. ³⁹Idi tahe Jesuisi iny rabòròhòkỹ asityre rorukukremy. ⁴⁰Idi tahe iny rabòròhòkỹ wii rirareare, ijò siwètamy, ijò 100my. ⁴¹Jesuisi orotxu utura-wana rimyre tahe retehere biu-ò Deuxu-ò rexitòenyre. Idi tahe orotxu reòròròre. Riwahinyre taeryđyřna mahādu-ò riwykremy iny-ò. Tule utura inatxi wirarea riwahinyre iny mahādu dee. ⁴²Ibutumy iny riroxire. Rihydymy rỹimyhỹ. ⁴³Idi tahe ritỹxinyre waòinatxi reurò weririmy orotxu yre yre utura-wana raulhenyredi. ⁴⁴Kia heka rerỹsỹre 5000 inymy rỹsỹna-di.

⁴⁵Juhu Jesuisi riteònyre taeryđyřna mahādu ixiko-ò kanaijòwe-ribi ijā-ò, Besaida hāwā-ò. Tii tahe ririre iny riteònykremy. ⁴⁶Tahe riteònyreu, tii rare ixitòedỹmy bede ratòhòkỹ-ò. ⁴⁷Txioro bedesou hāwò ahotya-ki ratximyhỹre. Jesuisi suki ratximyhỹre ixisohojile. ⁴⁸Tahe yhy rebònymyhỹ iutedereny-ribi. Hāwò rariaòlemyhỹ. Tahe Jesuisi tuu robire txu ijera iòhò-di. Tahe betyredile tamyreny rariare. Jesuisi iratyreny wese rariakre. ⁴⁹Tahe tuu robireu, betyre-di rariareriò, tiibohe unisỹna ròhòtynyreny, rirajuareny. ⁵⁰Tahe ibutumy tuu robira ibutumy ruberurennyre. Jesuisi aòwesele rarybere: —Urile beysabeny, breburennyòmty. Jiarỹle watxireri. ⁵¹Tii ralore tamyreny hāworo-ò. Yhy urile ixāwire. Ieryđyřnaboho bede riòtiinyreny. ⁵²Tiibohe ruberurennyre, orotxu bedeòbyna dori rierykòenyre.

⁵³Tiibohe riòhòrenyreu, ritehemynyre Kenesare-ò. Kia-ki hāwò ritisarennyra. ⁵⁴Tahe hāworo-ribi ròtuòreriu, ibutumy iny Jesuisi rieryra. ⁵⁵Juhu raòrunyrennyre bina bina mahādu òrysomy. Idi tahe didydenyde roholarennyre titxibo tai Jesuisi ratximyhỹò. ⁵⁶Tii raloreu iny hāwā-ò aòbo ada hāwāhākỹ-ò aòbo ada bedero-ò aòbo, tiiemy iny bina bina mahādu iryko-txi ritidire. Tai tamy rexitòenihikỹre tamy debò reakemy ityynora-ò. Ibutumy tamy debò reareu, tahe riteyteny.

7 ¹Jesuisi-ò ributunyre fariseu mahādu lahi rybe-di erydỹ̄đu mahādu wahe. Tule bede ywina erydỹ̄ mahāduributunyre. Jerusalē-ribi ritehemynreri. ²⁻⁵Jesuisi erydỹ̄na mahādu tebò risuhdõomy riroxireri. Fariseu mahādu, Bede ywina erydỹ̄ mahādu-wana Jesuisi-ò ritỹ̄raxinyrenyre: —Aõherekibo aerydỹ̄na tebò risuhdõomy riroximyh̄renyre. Aõherekibo ihetxiu bede ywidỹ̄nana rityhynyõreri. Lahi rybe-di erydỹ̄đu mahādu judeu mahādu-wana ihetxiu iwidỹ̄nana riwinyemyh̄renyre. Tii heka tebò tiu surõduõmy riroxiõmyh̄re. Tiiboho aõna aõna wydyna heto-ribi dõõsemahādeu, tiu heka rõhõõdile riroxiõmyh̄re. Sõwemy iwidỹ̄nareny rityhynymyh̄re. Bemona butxi, womati bese-wana risuhdõrenyre. ⁶Jesuisi tamy dirawyõnyde: —Isaia juhuule rarybere tiwesebo kaiboho toite. Kaiboho itxenadỹ̄đu toite. Riritinymy rỹre: —Kaiboho riwawowydynymyh̄re tary-di. Tahe awo-ribi waluuõlemyh̄re. ⁷Kaiboho riwawowydynyre tahe watxi nohõti ijeraõlerenymy. Kai teerynanyteri erydỹ̄na-di iny nohõti-ribi namyh̄deõle. ⁸Kai Deuxu erydỹ̄na tyhydỹ̄õmy. Iny erydỹ̄nale tetyhynytenyte. ⁹Tii tamyreny rarybera: —Kaiboho aõbo ijõ bihõrõnybenyleke, biaõmysỹnybenyke. Deuxu rybe bede ywina kaiboho tetyhynyõlemyh̄tenyte. Arybe bede ywinale tetyhynyõlemyh̄tenyte. ¹⁰Moisesi rarybera: —Kaiboho biytyhynybenyke adirybe-ò, tybyrybe-ò. Inyõ tadimy tybymy iehehemy rarybekeki, aõtaxiny ruruke. ¹¹Kaiboho teerynanyteri hābuõ-ò tadi tybywana-ò rarybekemy: —Wanieru waribi bitaõke. Ariwahiny dori Deuxu-ò. Wanieru heka korbỹ rare. (Korbỹ heka uri wahidỹ̄na rare, iwitxira rybe wahe.) ¹²Jesuisi rarybehyymy rare: —Kiawese rierynanymy raremyh̄, kaiboho uritere hābuõ tadiboho-ò aõmydỹ̄õmy rarekemy. ¹³Kawese ityhydỹ̄renyõmy Deuxu rybe, aerydỹ̄na òraru-ki. Sõwemy aõna aõna kawese tatỹ̄nytenyte. ¹⁴Tahe Jesuisi ixityre rarybera inysõwe-ò: —Bodoholabenyke, ibutumy bierybenykemy. ¹⁵Aõbo iny-ò ralõmyh̄re, kia tahe iny risunyõlemyh̄re, inywo-ribi tahe namyh̄de kia tahe iny risunymyh̄re. ¹⁶Inyõ bierybenykeki, bohola-wibenyke. ¹⁷Tahe iny-ribi rõhõnyreu, heto-ò raloreu, ierydỹ̄na mahādu tahe tamy rỹ̄raxire ijyymy. ¹⁸Tii tamyreny rarybera: —Kaiboho tule aõbo teeryõmahātenyte. Aõbo iny-ò ralõmyh̄re, kia iny risỹnyõlemyh̄re. ¹⁹Tawotyhy-ò dori ralõõlemyh̄re. Urile weryri-ò ralõmyh̄re idi umy-ribi rõhõnymyh̄re. (Ibutumy rỹsỹna tahe awire riki.) ²⁰Tule rarybera: —Aõbo iny-ribi namyh̄de, kia risurisunymyh̄re. ²¹Inywo-ribi tahe rõhõnymyh̄re ibutumy nohõtinana binahakỹ. Kia heka rare nohõtinana binahakỹ: òta òtalemy, wasilemy, rubudỹ̄lemy, ijõ hābu riõrese ridymy, ²²ibutumy aõna aõna wedu iny ratyrekemy, binamy rõhõtinymyh̄re, ruilemy, aõbina binaõle, itxeredu, aõbina binalemy rybedu, tule itxỹtelemy. ²³Kia heka ibutumy bina bina inywo-ribi namyh̄de. Kia heka iny rexisunymyh̄re. ²⁴Jesuisi rexitare. Tahe r re Tiro hāwāreny-ò, Sidõ beà hāwā hāwā-ò. Tahe tii ralore hetowo-txi tahe moõ rierykõdi ixidire hetowo-txi. Ralõrau tahe, rexiwõke aõkõ. ²⁵Jesuisi tyhynina-ò hāwyy roholare, tahe tamy nade, tatiowotimy resere.

Iriöre-riki tyytybybina dire. ²⁶Kia heka hāwyy Grego mahādu rare. Ilahinanire heka Siru Senisia. Tii Jesuisi-ò rỹraxire tyytybybina iriöre-ribi deòdỹmy. ²⁷Tahe Jesuisi tamy rarybere: —Txioiny, juhu inihe uladu mahādu riroxikre. Wadee awiöre uladu-ribi rỹs̄yna ritake ijõrsa-ò. ²⁸Hāwyy rirawõnyra: —Inatyhy rare, Wāhī. Kurile rỹs̄yna kyre kyre rejujumahāre. Kõwõruku bese-ribi, kuladu-ribi. Kiamy heka itxoõrõsa rirakuximyh̄yre. ²⁹Tahe Jesuisi tamy rarybera: —Kia rybe õraru-ki heka kaa tarybeta tyytybybina ariöre-ribi rohonyra. Kia bõðsekre aheto-ò. ³⁰Hāwyy taheto-ki rehemynyreu, iriöre-ki rahara byretyre-ki roire. Hāwyy rieryre tyytybybina iribi rõhõnyre.

³¹Tai tahe Jesuisi ixityre rexitare Tiro hāwāreny-ribi, Sidõ beà hāwā reny-ò rara Kalileia aho-ò. Tii raremyh̄yu, Debõwið hāwā hāwā reny ririre. ³²Tahe tamy didydenyde hābuõ nohõtityõ. Tii roholaõlemyh̄yre. Tule awimy rarybeõhyylemyh̄yre. Tahe rexitðenyrenyra Jesuisi-ò, tebð ityre ritidikemy. ³³Jesuisi tii ritare insõwehekỹ-ribi tahe tebð ritidire tõhõti-ò. Tahe rarybexinyre tahe idi tõrõtõbymy reare. ³⁴Tahe Jesuisi tarue ruwyre biu-txi, ele-di reare. Tahe rarybere: —Ebata. (Kia heka rybe riwiurõsòdỹmy rare, —Biraynyke.) ³⁵Aõwesele tõhõti riraynyre. Tõrõtõ riykoykonyre. Tii aõwesele awimy rarybere. ³⁶Jesuisi rarybere: —Uritere iny-ò ijyyõmykremy. Ihārele tahe ibutumy kiamy iny-ò relyymyh̄yre. ³⁷Idi bede riõtiiynyrenyre. Tahe raryberenyre: —Ibutumy tii riteytynymyh̄yre. Tii nohõtity aõwesele roholamyh̄yre. Hābu rybeõ aõwesele rirybedỹnyymyh̄yre.

8 ¹Kia txuu ixityre iny sõwemy ributunyre. Kiau tule aõrỹs̄ynamy ijõõhyllere. Jesuisi taerydỹyna mahādu ixidee ributunyre. Tahe tamyreny rarybere: ²—Jiarỹ insõwe rewotðenyre. Tiiboho txuu inataõ waki rỹireri byreõlemy. ³Jiarỹ byreõlemy ariteõnyrenykeki, ryrowetyakile reserenykre iõderawyrinymy. Tule, iny sõwemy irehe-ribi nade. ⁴Ierydỹyna tamy dirawõnyde: —Tymyaka inyboho tamyreny orotxu rikiwahinyrenykre kabederahy-ki. ⁵Tii ritỹraxinyre: —Tiwesebo orotxu kai ijõdire. Tiiboho rarybere: —Debð inatxi reurõmy. ⁶Jesuisi iny sõwemy risỹdỹnykremy sutyre-ò. Tii orotxu debðinatxi reurõmy rimyra. Tii rexitðenyreu tahe riorore. Tahe riwahinyre taerydỹyna mahādu-ò riwykemy iny sõwe-ò. ⁷Tule utura ibutemy rỹimyh̄. Tahe rexitðenymy rahudi tahe taerydỹyna-ò rarybere: —Kaa tule biwybenyke iny sõwe-ò. ⁸Tiiboho riroxirenyremy tahe rihydymy ratximyh̄. Iyre yre rauhenyre riwyrenyre weriri debð inatxi reurõmy riwyrenyre rỹyximy. ⁹Inaubiõwa mil iny iõhõmy rỹimyh̄. Tahe Jesuisi rexideõwarinyre iny sõwe-ò. ¹⁰Tii ralore hāworo-ò taerydỹyna-wana. Tiiboho roire Damanuta hāwāreny-ò.

¹¹Lahi rybe-di erydỹydu mahādu nade fariseu mahādu wahe. Tiiboho tamy nade rybe õbitidỹmy. Tiiboho rỹraxirenyra bede erydỹynaõ kiditeòsinykremy. Lahi rybe mahādu rierykemy tii inatyhy rare urenana. ¹²Tii raelewesenanyre tawo-ki rarybere: —Aõherekibo kaa iny mahādu rỹraximyh̄yre bede erydỹynamy. Inatyhymy jiarỹ ararybekre: —Bede

erydÿÿna heka tamy rawahidÿÿôtyhy. ¹³ Tahe idi Jesuisi rexitare. Hâworo-ò ralore. Idi rohorere kanawe-ribi ijâ-ò.

¹⁴ Ierydÿÿnaboho tahe tôhòti rosare orotxu wydysy-ribi. Sohojityhyle heka orotxu roimyhÿ hâworo-ki. ¹⁵ Jesuisi tamy ribedeerynyre:

—Beteheiny, biyrubuny, lahi rybe mahâdu, Herodi mahâdu-wana wirÿsÿna uri-ribi. ¹⁶ Jesuisi erydÿÿna mahâdu ixideele rarybere:

—Aôherekibo Jesuisi kia rarybereri. Inyboho iorotxurenyôreriki òsana.

¹⁷ Jesuisi heka rieryra tahe rarybera: —Aôherekibo raryberemy orotxu ijôôremy. Kaiboho aôbo teerytenyôte. Kaiboho aôbo arawoxierynyrenyôre.

¹⁸ Kaiboho aôbo arueôrenyre. Tabiôletenyteri. Kaiboho aôbo itxi ôhôtireny reaôlereri.

¹⁹ Jiarÿ 5000my iny-ò orotxu rearearu, tiwesebo weririmy orotxu yre

yre-di ritÿxinyre. Tahe tiiboho rirawyònyre: —Waòinatxi reurò weririmy.

²⁰ Tahe debòinatxi reurò orotxumy reòròra 4000 inymy, tiwesebo weriri orotxu yre yre-di ritÿxinyre. Tiiboho rirawyònyre: —Debòinatxi reuròmÿ.

²¹ Tahe tamyreny rarybere: —Timyrekibo tahe teerytenyôte.

²² Dehemynyde Besaida hâwâ-ò. Tahe hâbu ruetà-di tamy didydenyde.

Rexitôenyrenyre tamy debò reakemy. ²³ Jesuisi tebòmÿ rimyre tahe ridyre

hâwâ-ribi bederahy-ò. Iruetyre rarybexinyre. Tebòmÿ tamy reare. Tahe

ritÿÿraxinyre: —Aômÿbo aôbo tabiteri. ²⁴ Hâbu tahe biu-txi tarue riukora, tahe

rarybera: —Hâbumy rabira, òwòru wese rÿireriò, riarareri. ²⁵ Ixityrele Jesuisi tebò

reare irue-ò. Hâbu heka irue reyteramy òbitilemy retehereri. Robire irehetyhy-ò

itÿnyhÿkÿlemy. ²⁶ Tahe Jesuisi riteònyre isÿ-ò urile ihâwâ-ribi ròðseòmÿkre.

²⁷ Jesuisi taerydÿÿna mahâdu-wana ròhònyrenyre Sesaria Filipi hâwâreny-ò.

Ryki taerydÿÿnareny-ò ritÿÿraxinyre: —Mowe hâbureny wamy raryberenyra

jiarÿ raremy. ²⁸ Tiiboho rirawyònyra: —Joaô Sebedÿÿdu riki, ijô Eliasi riki, ijô

riki Deuxu rybedÿÿduò. ²⁹ Tahe Jesuisi tamyreny ritÿÿraxinyra: —Kaiboho,

mobo tarybetenyte jiarÿ raremy. Tahe Pedro rirawyònyre: —Kai Kristu

atximahâte. ³⁰ Tii raraybinihikÿmy ixi-ki rarybera: —Inyko wamy ijyÿòmÿkre.

³¹ Jesuisi rexiranyre erydÿÿmy: —Deuxu Riòre Hâbutyhyhykÿ heka aôna

aônamy aôhòkÿmy rotÿÿnynihikÿkre. Matuari mahâdu heka ixideramy

rynanakre. Tule Deuxu aômÿsÿdÿÿdu wedu, Bede ywina erydÿÿ mahâdu

ixideramy ryanakre. Jesuisi kudurukre idi tahe txu inataò rÿidi kedexixakre

rubu-ribi. ³² Idi tahe iòrurehekÿlemy tamy rarybere. Pedro iny-ribi Jesuisi

ritare, tahe tamy rarybere: —Kawese rybeòmÿreke. ³³ Jesuisi ròðsemy reare,

retehemyhÿ taerydÿÿna-ò tahe Pedro-ò rarybere: —Bexitake wako-ribi

Satanasi. Kai dori Deuxu ijoi aôkô atximahâte. Kai hâbu ijoi tate. ³⁴ Jesuisi

ributunyre iny sôwehekÿ, taerydÿÿna-wana tahe rarybere: —Inyô wahemy

kanakeki, ixideele rexirahike, tahe taitxeò rimyke riwaheludunyky. ³⁵ Mobo

taumy tarasamy rurukeki, riononykre. Tahe aòtxile iny waluukeki, Rybewihikÿ

luukeki, taumy wadee riononykeki, kia heka taumy ritakre. ³⁶ Aôbo tahe awire,

ibutumy aôna aôna bitake tai aumy biononyke. ³⁷ Aôbo tahe iny riwahinykre

taumy wydyna òkesena aõbo. ³⁸Kai wijinabòdu òrarudu mahãdu rare, òta òtadu rare. Aõtxile iny walau warybe lau raixỹrukeki, tule Deuxu Riòre Hãbutyhyhykỹ ilau kanaixỹrukre tii nadeu jỹjuwihikỹ-di boo wowydyna-ò.

9 ¹Tii tamyreny rarybere: —Inatyhymy adeereny ararybekre. Ijõõ kaki ratximyhyre ruruòtyhy Deuxu Iðlònau taruru-di kedehemynykre.

²Thahe debò sohoji txuu rỹidi, Pedro, Txiau, Joaõ-wana Jesuisi ridyre. Tiiboho sohojile bederatò-ò roire. Jesuisi tamyreny rexiwitxiranyre. ³Ityy heka urile rabòòranyre. Iurahakỹmy relere suròna ratyre heka rauranymy ritoosònyre.

⁴Thahe tamyreny dexitỹnnynde Eliasi, Moisesi-wana thahe rarybemyhyre Jesuisi-wana. ⁵Pedro rarybere Jesuisi-ò: —Wawedu, awityhymy inihe kaki ratxirenyreri thahe rikiwinyrenykre inataõ hetomy, ijõ adee, ijõ Moisesi-ò, ijõ Eliasi-ò. ⁶Pedro rierỹòlemyhyre aõmybo rarybekemy ruberumyhyremy. ⁷Nonoe dobehede iubòròna bede ritòbònyre. Thahe rarybere reare rybeuni iy-ribi: —Kia heka wariòre waluu rare. Kaiboho tamy bohola benyke. ⁸Tiiboho reteherenyre thahe inyò robiòlerenyre. Jesuisilemy robirenyre.

⁹Dobehedeu thahe inydee Jesuisi rarybere: —Uritere inyò-ò tuu ijyõomykre aõmybo tobitemy. Uritere Deuxu Riòre Hãbutyhyhykỹ rubu-ribi rexixareu, tai thahe tuu belyybenykre. ¹⁰Kia rybe wasimy riworenyre. Ixideerenyle wii ritỹraxinyrenyre: —Aõmybo rarybereri, rubu-ribi rexixamy nade.

¹¹Tiiboho tamy rỹaxirenyre: —Aõherekibo bede ywina erydỹ mahãdu rarybere Eliasi juhu kanakremy. ¹²Tii rirawyònyre: —Inatyhymy, Eliasi juhu nade. Ibutumy aõna aõna riywinykremy. Tewesebo raritinanyreri: —Deuxu Riòre Hãbutyhyhykỹ aõna aõnamy aõhòkỹmy rotỹynihikỹre. Thahe tii inydee awiòhykỹre. ¹³Adeereny ararybekre: —Eliasi nade. Tule iny ixideewilemy tamy riwinyrenyre. Kaheka iaõmydỹnana riritinanyreri.

¹⁴⁻¹⁵Jesuisi dehemynydeu taerydỹna mahãdu-ò, thahe robire iny sòwehekỹmy thahe bede ywina erydỹ mahãdu taerydỹna-wana ritxiònymyhyre. Thahe Jesuisimy robireu, thahe tiiboho riumysaõnyrenyre. Raòrunyrenyre irybedỹmy.

¹⁶Tamy rỹraxire: —Aõmybo tamyreny tatỹraxinyteri. ¹⁷Inyò rirawyònyre: —Erydỹdu, wariòre adee redyreri. Tii tyytybybina rybeòhòkỹ-di ratxireri.

¹⁸Tyytybybina rimyreu thahe riatyre bede-ò. Idi thahe urile txuu riyiyinyre. Thahe tii rubureriwesele roire. Aerydỹna-ò jiarỹ rarybera tyytybybina riteranykremy, thahe tiiboho iruruòhyymyhy. ¹⁹Jesuisi tamyreny rarybere: —Tiwesebedỹnanabo wijinabòdu ityhyòlemy rỹira. Tiwesebedỹnanabo awanareny ariijekemy. Wadee uladu bididyke. ²⁰Thahe didydenyde Jesuisi-ò. Jesuisimy robireu thahe tyytybybina urile raitxỹteitxỹtenymy resere. Idi thahe urile bede-ki rara òhòremy raratymyhy rybexi irywomy ròhònymyhy. ²¹Jesuisi rỹraxire uladutyby-ò tiubedemybo thaheka kaa binana tamy dehemynyde.

Tii rarybere: —Uladuylale idi ròrarunyre. ²²Tiwese wese aõkò idi rehure bera-ò, heòty-ò rahukemy. Aõ biwinykeki, jiarỹboho biwawiòhenanyke wijile. Kai biwaruxetòenybenyke. ²³Jesuisi rarybere: —Kai bityhinykeki, ibutumy aõna aõna rỹimyhỹre. ²⁴Aõwesele uladutyby rryre idi thahe rarybere: —Jiarỹ

retyhnyre, biwiðhenanykre aõbo rauhenyre. ²⁵Jesuisi iny sõwemy robire wii rotyrerimy, tahe riteranyre tyytybybina-ò: —Kai tyytyby rybeõ tule roholaõ iribi bòhònykre, tiu ixityre malòótyhy. ²⁶Tyytybybina rryre. Uladu ritxýtenyre idi tahe ròhònyre. Uladu rubuwesele roire herimy. Tahe iny sõwemy rarybere: —Tii rurura. ²⁷Jesuisi rimyre tebò ritamadýñnyremy tahe uladu rýire lamamy. ²⁸Heto ralorenyreu ierydýña mahádu tamy rýñraxirenyre: —Aõherekibo jiarýboho tyytybybina riteònyõrenyra. ²⁹Tamyreny rarybere: —Kaiboho bexitòdenybenykeki byreõna-di bonybenykeki, kiawesele heka ròhònyke.

³⁰Iribi ròhònyreu, Kalileia lowysy-di roirenyre. Jesuisi heka inyerydýñderamyhý tai ratximyhýki. ³¹Taerydýña mahádu Jesuisi riernanymyhýre. Jesuisi tamyreny rarybere: —Deuxu Riòre Hãbutyhyhyký heka rawahidýñkre hãburenyõ-ò. Tii hãbureny rirubunykre. Idi tahe txu inataõ txuu rýidi tahe kedexixakre rubu-ribi. ³²Tiiboho rierykòlere tahe ruberurenre týñraxidýñki.

³³Idi tahe rehemynyre Kafanaõ-ò. Ralore heto-ò. Jesuisi tamyreny rýñraxire: —Aõmywe widee tarybetenyteri rryo-ki. ³⁴Tiiboho urile roholarenyre rybeòlemy. Rryo-ki dori rarybemyhý mowexe wiribi aõnimy ròhònykre. ³⁵Tahe Jesuisi ronyrenyredi, Jesuisi taerydýña mahádu ributunyre erydýñmy: —Inyò juhuludumy rarekemy ratxikeki, tai heka tii ihewoludukre. Tule tii reakre ibutumy deòdumy. ³⁶Tahe Jesuisi uladuõ rimyre risýnyre iubetya-txi tahe taerydýña-ò rarybere: ³⁷—Moõ uladu kawese wadee riwiðhenanykeki, riwawiðhenanyre. Moõ riwawiðhenanykeki, tule wateòdýñdule riwiðhenanyre.

³⁸Joao tamy rarybere: —Erydýñdu, jiarýboho tuu rabirenyra inyò tyytybybina-di ani-ò rehureriò. Tahe iny mahádueny aõkò rare. Tahe jiarýboho tamy reijõnyrenyre iny mahádueny dori aõkò rare. ³⁹Tahe Jesuisi rarybere: —Bijõnybenyòkre. Inyò wani-di bedeòby riwinykeki, wanimy heka ibinamy rarybeótyhy. ⁴⁰Iny òluduòkeki, tii heka iny ijoi rare. ⁴¹Inyò beò adeereny waninamy riwahinykre-wana, kai waerydýña dori tate, inatyhymy adee ararybekre. Tii tawahidýña ritakre. ⁴²Inyò kaa uladu ityhydýñdu riatykre òraruna-txi, kia heka tamy awire tòti-ki myna ritaamy idi bera-txi rehure. ⁴³Ebòle araatykeki òraruna-txi, juhuule adee awire ebò biòròke. Kia heka awityhykre iny welytyle ralokre biu-ò, tahe awiòtyhykre heòtytòteeheký-ò ralòkeki debò inatxi-di. ⁴⁴[Tai mohò ruruótyhy. Heòty ruruótyhy.] ⁴⁵Awa araatykeki òraruna-txi, juhuule adee awire awa biòròke kia awire iny rariake awa sohojilemy, awiòre heka heòtytòteeheký-ò ralokre awa inatxi-di. ⁴⁶[Tai mohò ruruótyhy. Heòty ruruótyhy.] ⁴⁷Arue araatykeki òraruna-txi, bitake idi behuke juhuule adee awire arue sohoji-di Deuxu Iòlò biu-ò ralokre, tahe awiòre heòtytòteeheký-ò ralokre arue inatxi-di. ⁴⁸Tai mohò ruruótyhy. Heòty ruruótyhy. ⁴⁹Ibutumy iny heka heòty-di rijjyranykre. ⁵⁰Jyyra heka awire, saa wahe. Urile taruru riononykeki, tiwesebo tarýsýna uri ixbyle tawo-ki bitidikre. Kaiboho ibutumy widee eysarenylere.

10 ¹Jesuisi iribi rexitare. Tahe rare Judeia bede bede-ò, tule Jordaõ kanawe-ribi ijà-ò. Iny sõwemy tamy ributunyre, tahe tiiboho Jesuisi riernanyre. Tii reðarimy tuu ratximyhýre.

²Tamy lahi rybe-di erydÿÿdu mahādu dehemynydenyde irutaadÿÿrenymy. Tahe tamy rÿÿraxinyre: —Hābu aōbo tahāwyy ririleke, awire aōbo ibinare aōbo. ³Tahe Jesuisi tamyreny rirawyònyre: —Aōrybe bede ywina-di Moisesi rierynanyre. ⁴Tahe tiiboho Jesuisi-ò dirawyònydenyde: —Tii rierynanyre iny tahāwyy ririkemy. Urile juhuu hāwyy bede erydÿÿna rybe tyyriti riwinykemy, idi tahe tahāwyy ririkemy. ⁵Jesuisi tamyreny rarybere: —Ōhòtityre dori Moisesi kia rybe bede ywina adee riwahinyre. ⁶Juhu bedeu Deuxu riwinyre hābu, hāwyy-wana.

⁷Iurenana tahe hābu tadibohosÿ-ribi ròhònymyhÿre tai roimyhÿre hāwyy-wana.

⁸Hābu inatyhy hāwyy-wana roimyhÿreu, sohoji tyhylemy radenymyhÿre. Iny inatxi inymy aōkō rÿimyhÿre, sohoji tyhylemy rÿimyhÿre. ⁹Hābu hāwyy-wana Deuxu ributunyre, iny iwitxira wiribi ritòhòrienyòtyhy. ¹⁰Hetowo-ki tahe ierydÿÿna ritÿÿraxinyre kia rybe-ki. ¹¹Jesuisi tamyreny rarybere: —Aōtxile hābuō tahāwyy ririkeki tahe ijō-wana roiikeki, kia heka òtadu rare. ¹²Hāwyy tahābu ririkeki tahe ijō hābu-wana roiikeki, kia heka wedena rare.

¹³Tiiboho tamy didydenyde uladu tamy debò reakemy. Tahe ierydÿÿna riononymy rarybere tamy idyrenyòmykre. ¹⁴Jesuisi kiamy robireu, rikyaranyre rarybere: —Txiò, kididyke uladu wadee. Uladu wese dori Deuxu Iòlòna rare. ¹⁵Inatyhymy ararybekre: —Moō heka uladuwesemy Deuxu Iòlòna ralòkeki, kia heka Deuxu Iòlòna-ò ralòòtyhy. ¹⁶Tahe Jesuisi rexiranyre uladu manamy taaxiò-ò rimyre. Tahe tebò iratytyre ritidimy tamyreny rarybewihikÿre.

¹⁷Tahe Jesuisi rydi raloreu, hābuō tamy reare. Tahe hābu iko-txi resere tatiwotimy. Rarybere: —Erydÿÿdu wihikÿ, aōwexe ariwinykre biu-ò hena aritakremy tiiehyymy umywihikÿ-di ararekremy. ¹⁸Jesuisi tamy rarybere: —Aōherekibo wihikÿmy wadee tarybeta. Hābu awiōre. Deuxu sohojile tahe awire. ¹⁹Bede ywina kai teeryte: rubudÿÿòmykemy, tule òta òtaòmykemy, wasiòmykemy, tule ruiòmykemy, iny wii itxenadÿÿòmykemy, adi bityhynkemy, boo tule. ²⁰Hābu tamy rarybere: —Erydÿÿdu, kia bede ywina rewinyhyllere, uladuule wiji-ò. ²¹Jesuisi tamy retehere tuu reòarire tahe rarybere: —Kai sohoji aòmydÿÿnale aki nasiranyde. Kai makre, ibutumy aōna aōna-di bòhònykre, idi tahe idi biwahinykre iny aōkō mahādu-ò. Kia tahe aòmydÿÿnadikre biu-txi. Tahe manakre biwaheludunykre. ²²Kia rybe-ki heka hābu rabadewore. Rexitare ibedewomy urile iaōna aōna sòwetyhyreki.

²³Jesuisi retehemy iwerura-di tahe rarybera taerydÿÿna-ò: —Kia iny iaōna aōna sòwemy rÿireri, tamy Deuxu Iòlòna-ò ralòke isirare. ²⁴Ierydÿÿna mahādu bede ribedeòtiinyrenyre irybe-ki. Jesuisi ixityre rarybere: —Waexiboho, isiratyhy rare Deuxu Iòlòna-ò ralòkemy. ²⁵Kamelo tyyrorenawo-di ralòkemy isirakeki, kia-ribi isiratyhyre iny iaōna aōnadikeki ralòke Deuxu Iòlòna-ò. ²⁶Tiiboho bede ratiinyre sòwemy. Widee rarybere: —Mobo tahe iòraru-ribi iny ritakre.

27 Jesuisi iwerora-di retehere tahe rarybera: —Inatyhymy kōaōboka hābu-ò isiratyhyre. Deuxu-ò tahe ibutumy aōna aōna isiraōre. 28 Pedro rexiranyre rarybere: —Boholake, jiarỹboho ibutumy rerirenyra araheludunykremy. 29 Jesuisi rarybere tamy: —Inatyhymy adeereny ararybekre. Moō waluukeki, rybewihikỹ luukeki, kia heka ririkre: heto, taseriōre, tyby tadi-wana, tariōre, tabede, ibutumy ririkre. 30 Wijile itarasamy rarekre: 100 sỹmy, 100 seriōre, 100 tybyboho, 100 tadiboho, 100 tariōreboho, 100 tabede. Iny tamy rarybebinanykre tule. Ijō bede kanakre tahe taumy tỹmyra-di tiemy rarekre. 31 Tahe sōwere juhu ludu ihewomy rōhōnykre. Ihewo ludu ijō iko-ò rōhōnykre.

32 Tiiboho rydi raōwōnyrenyre Jerusalē hāwā-ò. Jesuisi heka rare ikorenymy. Ierydỹna mahādu bede ribedeōtiinyre. Tiiboho Jesuisi riheludunymy ihewo-ribi. Tahe Jesuisi reraōmyhỹ idi rare wađinatxi reurò taerydỹna mahādu-wana. Tii relyyre ixityre aōbo ixidee kỹnykremy. 33 Boholabenyke inyboho roirenyreri Jerusalē-ò. Kowa, jiarỹ Deuxu Riōre Hābutyhyhykỹ, inyō riwawahinykre Deuxu aōmysdỹdỹdu mahādu wedu-ò, bede ywina erydỹ mahādu-ò. Kia warubudỹmy riwawahinykre tori-ò. 34 Tiiboho kidiwalahikre. Watyre kanarybexinykre. Òhōte-di kidiwahātenykre. Idi tahe kidiwarubunykre inataō txu-di. Tahe rubu-ribi adexixakre.

35 Joaō, ijō Txiau, wii Zebedeu riōre, tamy nade. Tahe rarybere: —Erydỹdu, kai aōma aō wadeereny biwahinykre. 36 Jesuisi rarybere: —Aōbohe jiarỹ adeereny ariwahinykre. 37 Tahe tamy rarybere: —Kai, aiōlōnasỹ-ò kedeheminykreu, aruruwe-ribi aronykre, waseriōre ahywewe-ribi ronykre. 38 Tahe Jesuisi rarybere: —Kaiboho teeryōlemahāte aōmybo textitōenyteri. Kaiboho aōbohe wabemona-di biōbenyke idi Jerusalē-ò adiōkremy wahāredi. Kaiboho aōbohe wasebena-di mohōlebenyke idi jiarỹ anohōkremy wāhāredi. 39 Tiiboho dirawyōnyde: —Kohe tulekre. Jesuisi tamyreny rarybere: —Bemona-di ariōkre kaiboho tule idi biōbenykre. Sebena-di jiarỹ adohōkremy, kaiboho tule idi mohōbenykre. 40 Tahe mobo wabire ronykre ruruwe-ribi hywewe-ribi kia heka jiarỹle ariwahinyōkre. Kia tahe iyrubudỹmy rỹireri Deuxule kidiwahinykremy. 41 Tai debōwiō erydỹna mahādu heka Joaō-ò, Txiau-ò tamyreny iky reare. 42 Jesuisi tamyreny ryryre tamy kanakemy, tahe rarybere: —Kaiboho teerytenyete toriwedu irurusōwe dire. Iny nihikỹ heka inymy deōdu luure. 43 Jesuisi kiamy rarybere: —Kia wese tahe aworeny-ki aōkōkre. Kaiboho aōtxile mobo bōityhnyhykỹ, ijō iny deōdumy rarekre. 44 Mobo juhutyhy rarelekre, deōdumy rarekre. 45 Deuxu Riōre Hābutyhyhykỹ nade teōdu sōwekemy aōkō tahe ixilemy reōdunykemy. Nade taumy wahidỹmy sōwemy iny tarasamy.

46 Idi tahe roire Ijeriō hāwā-ò. Jesuisi taerydỹna-wana iny sōwehekỹ-wana rōhōnyrenyra. Tahe rahare Bartimeu ruetāhākỹ-ki. Bartimeu tahe Timeu riōre rare. Tii ronyre rywe-ribi aōna aōnamy rexitōenyre. 47 Tii roholare Jesuisi Nazare ludu kia rare tahe tamy ryryra: —Jesuisi, Davi riōre, wadee maruxetōekre. 48 Sōwemy tamy rarybere: —Rybeōmyke. Tahe aōhe-wana tii rarybemyhỹre: —Davi riōre wadi mawotōeke. 49 Jesuisi ryryre

tahe rarybere: —Tamy byryke wadee kodoikemy. ⁵⁰ Tahe rexitareu rÿire, wylemy nade Jesuisi-ò. ⁵¹ Jesuisi tamy rarybere: —Aõmybo kai taruteri adee ariwahinykremy. Tahe hãbu ruetãhãkÿ tamy rarybere: —Wawedu, ixityre arobikremy. ⁵² Jesuisi tamy rarybere: —Makre, atyhydÿÿna kai arateytenyra. Kialehe rare. Aõwesele ixityre tii robire. Tahe Jesuisihemy rare, ryki.

11 ¹ Jerusalẽ ìhòmy ritehemynyrenyreu, tahe inatxi taerydÿÿna riteònyra hãwã-ò. Inatxi hãwã-ò ìhòmy, Betabaji, Betÿnia-wana. Kia-ò Oliveira hãwãlò roire. ² Jesuisi rarybere: —Kaiboho boikre kowa hãwã-ò. Kowa-ò birònykreu jumentinho mahabenykre. Moheka ityre rariaòlemy ratximyhÿre. Bieseke, wadee bididyke. ³ Inyò adeeremy rarybekeki: —Aõhekremybo idi atxitenyteri. Tahe tamy marybebenykre: —Wanyrÿ tuu rurureri. Ixityre kaò kidiòkesedÿÿnykre. ⁴ Tahe hãbu roire. Jumentinho ryro hetojjò-ki ritisanymy rÿimyhÿ. Tai riesere. ⁵ Kia hãwã mahãdu rarybere: —Aõherekibo jumentinho kaiboho tetatenyta. ⁶ Tai tiiboho Jesuisi rybe tamy riwahinyra. Tai hãwã mahãdu jumentinho riwahinyre. ⁷ Tahe ridyrenyreu jumentinho Jesuisi-ò. Tiiboho tatyreny ritidirenyreu jumentinho tyremy. Tiiboho risÿnyrenyreu Jesuisi ityre-ò. ⁸ Ijòboho tahe horerule ritidire ryromy, ijò tahe tauwòhi ryromy ritidire ityre rariakemy. ⁹⁻¹⁰ Ihewo ludu, iko ludu rawyhyrarònyreri, tule ryrereri: —Tii heka wowydyna rare. Tii heka Wanyrÿ niwesekemy naderi. Wowydyna rare iny labie Davi Iòlòna. Kai Iòlòna kanakre. Wyhyrarò biu-txi kodoholakre.

¹¹ Kia wese Jesuisi ralore Jerusalẽ-ò. Dohodÿÿna heto-ò ralore, ibutumy retehere, idi tahe ròhònyre txiorotyhyreki. Tahe Betÿnia-ò roirenre.

¹² Ijò txu biòwamy tahe Betÿnia-ribi rexitarenre tahe tii rama rahure. ¹³ Òwòru figueira rademy robirenmy irehe-ribi. Tahe tamy ritehemynyreu iraty-ki raharenyòlere, aõmyreki figueira raty bededÿÿnanamy aòkò bede rÿimyhÿre urenana. ¹⁴ Òwòru figueira-ò Jesuisi rarybere: —Tiu heka moò araty ritòòtyhy. Tahe ierydÿÿna roholare.

¹⁵ Tahe ritehemynyrenyreu Jerusalẽ hãwã-ò. Tahe Jesuisi dohodÿÿna hetowo-ò ralore. Tahe kia-ribi aõna aõna-di rohonymyhÿre mahãdu, òbradu mahãdu diteònyde. Tahe nieru wibydyÿÿdu mahãdu, òwòrubesedÿÿ-di Jesuisi rehure. Bòtòe dinodu mahãdu rynana-di Jesuisi rehure. ¹⁶ Inyò heka ritxydyÿÿnyòlere dohodÿÿna hetowo-ki.

¹⁷ Rierynanymyhÿre tahe tamy rarybere: —Raridÿÿòlemy aõbo rÿireri:

Waheto kòãòboka inatyhymy ibutumy iny witxira witxira dee

ixitòedÿÿna hetomy rÿirakre. Waheto tewinytenyete wasidu hetowesele.

¹⁸ Bede ywina erydyÿÿ mahãdu, Deuxu aõmysÿdyÿÿdu wedu mahãdu roholarenre, ròhòtinyrenre: —Timybo inyboho Jesuisi rubudÿÿmy rokiwisÿnykre. Tiiboho ruberumyhÿrenre iny sòwemy dori bede riòtiinymyhÿ ibedeerydÿÿnarenre-ki.

¹⁹ Txioromy dehemynydeu, tiiboho rexitarenymyhÿre hãwãhãkÿ-ribi.

²⁰ Txu ròhòny-di, rehemyrenre òwòru figueira-ò. Tiiboho robirenre rarubumy rÿireriò, taru-wana, tararoti-wana. ²¹ Pedro ixi-txi tòhòti reare tahe



(Marku 11.8)

rarybere: —Erydỹ̄du, betehe inihe aõma òwòru figueira rarubumy rỹ̄ire arybebina-di tamy tarybetaki. ²²Jesuise dirawyònyde: —Kaiboho Deuxu bityhynmyhỹbeny. ²³Inyõ rarybekeki kaa bede ratòdòhòkỹ-ki: —Kai myike, adi adehu rỹ̄ikre berohokỹ-ki. Tahe irybe heka kedelekre. Tai inyõ rityhynykeki, tumy heka kedelekre. Tahe uritere iseòdỹ̄õmykre urile bityhynykre, irybe heka kedelekre. ²⁴Iurenana adee ararybekre: —Aõt̄xile aõ bexitòenykre, kia heka bitakre. Bityhynykeki, inatyhymy bitake. ²⁵Kaiboho textitènytenyteri wana aõbo inydee aky reamyhỹre kia biixãwididỹ̄nynmyhỹke ratximyhỹre,

Deuxu dori riixāwididỹnyke aòrarureny-ribi. ²⁶Kai iny wixira òraru biixāwididỹnyòkeki, boo biu-ki ratximyhỹre aòraru riixāwididỹnyòkre.

²⁷Tiiboho ixityre doide Jerusalē hāwā-ò. Ririranymhỹrenyreu dohodỹna hetowo-ki, bede ywina erydỹ mahādu, Deuxu aòmỹsỹdỹdu wedu mahādu, matuari mahādu tamy doide. ²⁸Tiiboho tamy ritỹraxyreny: —Mowe atedỹdu kia aõna aõnamy tatỹnymhỹte. ²⁹Jesuisi dirawyònyde: —Adeereny tule araỹraxikre. Kaiboho bidiwawyònykeki, tahe jiarỹ akoreny ỹraxina arelyykre, aòrurudibo aõna aõna rewinyhỹre. ³⁰Tahe Jesuisi ritỹraxyreny: —Ratysebedỹna, Joaõ hõrõ, kia heka tiribibo nade, biu-ribi ada hābu mahādu-ribi. Kia manarybeke. ³¹Tiiboho widee rarybera: —Biu-ribi inyboho raryberenykeki, tai tii rarybekre: —Aõherekibo tahe tii tetyhnytenyõte. ³²Hābu-ribi inyboho raryberenykeki, iny aruberumhỹrenykre. Ibutumy iny rityhnyre Joaõ heka Deuxu rybedu raremyhỹ. ³³Tai tahe tiiboho rarybereny: —Inyboho reeryõreny. Tai tahe Jesuisi rarybera: —Hebo, jiarỹ adee arelyyõtyhy modeòdỹdubo jiarỹ watxireri.

12 ¹Iribi tahe Jesuisi tamyreny ijyy-di riernanymhỹre: —Hābu uva oworuò wese ròbròre. Tahe riòtitynyre. Tahe hāloo riare oworuubetya-ki, ruỹdỹnymy. Tahe utò riwinyre. Idi tahe rihuòtere hābu mahādu-ò. Tahe rexitare tasỹ-ribi ijõ bede-ò. ²Tahe bederatysiredemy bededỹnana rehemynyreu, iwedu teòdu riteònyre bederaty ritakemy. ³Huòtedu mahādu teòdu rimyreny, riheteny tahe riteònyre ixihyykemy.



(Marku 12.1)

⁴Ixityre oworuwedu teòduõ riteònyre. Kia heka irati rihetenyre ta tamy rawobinarybenyre. ⁵Ijõ riteònyre. Kia heka rirubunyre. ⁶Thahe oworuwedu iriõre sohojilere, thahe iluumy raremyhỹ ihewomy tii riteònyre. thahe wedu rarybere: —Wariõrele heka tiiboho rityhynyrenykre. ⁷Kia huòtedu mahãdu widee raryberenyre: —Kia heka wedu aõna aõna tarasadu rare. Rikirubunykre thahe iaõna aõna inydeerenykre. ⁸Thahe rimyrenyre idi rirubunyre thahe idi rehurenyre oworu-ribi. ⁹Jesuisi ritỹraxyre: —Aõhebo thahe oworuwedu rotỹraxyre. Tii kodoikre huòtedu mahãdu hudumy, tai thahe oworu riwahinykre inywitxira-ò. ¹⁰⁻¹¹Ritina-di aõbo tariaõletenyte kia ryberiti:

—Mana-di hetowidỹydu rehura. Kia mana heka hetohãtxi-ki ritidimy doide.

Kia heka Wanyrỹ riwinyre kia iny ruerenyre dee aõna aõna nihiky rare.

¹²Tai ijohonadu mahãdu Jesuisi mynymy ratximyhy tii dori rieryre ixidee lau Jesuisi ijyymy relymyhyre. Tiiboho ruberurenyre iny sõwehekỹ lau. Thahe rexitarenyre, rexixãwidinyre.

¹³Idi riteònyrenyre Lahi rybe-di erydỹydu mahãdu, Herodi mahãdu-wana tamy imynamy irybe-ki. ¹⁴Tiiboho rarybere Jesuisi-ò: —Erydỹydu, jiarỹboho araeremy adi watxiwãhãrenyre kai inatyhy hãbu tate. Iny ibutumy adee wiwese wiweselere. Inatyhymy iny-ò Deuxurymy teerynanyamahãte. Thahe tiiboho ritỹraxyrenyre: —Awire aõbo ada ibinare aõbo nieru rawahinyhyre bede dinodu-ò. ¹⁵Timybo thahe, rikiòwyny aõbo ada aõkõre aõbo. Jesuisi rierymyhyre tõhõtinanareny, thahe ritỹraxyre: —Aõherekibo kaiboho tiwaurihitenyteri. Wadee womati nieruõ bidiwy waitxerenamy. ¹⁶Thahe tamy diwydenyde. Thahe tii ixityre ritỹraxyre: —Kawe moõ tyttarasana rare, katahe moõ tyritina rare. Tiiboho dirawyònyde: —Kiahe bede dinoduhõrõ rare. ¹⁷Jesuisi rarybere: —Hỹdebo, bede dinoduhõrõ thahe tamy biwahinybeny tule thahe Deuxu aõna aõnahõrõ tamy biwahinybeny. Tiiboho bede riòtiinyrenyre.

¹⁸Saduseu mahãdu tamy nade. Kia heka iny rubu-ribi rexixamy aõkõre-riki rierynanymyhyre. Tiiboho ritỹraxyre Jesuisi: ¹⁹—Erydỹydu, Moisesi raritinyra bede ywina-di: —Hãbuõ rurukeki, tahãwy iriõre ijõdiõkeki, thahe kia hãwy tahãbu seriõre-wana roike. Iriõredikre taseriõre rubuòwymy roikre. ²⁰Seriõre debòinatxi reuròmymy raremyhỹ. Juhuu ijõ roire hãwy-wana. Thahe tii rurure iriõreõlemy. ²¹Thahe ihewo ludu iseriõre wytese-wana roire. Tii rurure iriõreõlemy. ²²Ihewoludutyhy tule ibutumy roire wytese-wana, thahe ituerenyre iriõreõlemy. Iròòbymy thahe hãwy tule rurure. ²³Ixixanau thahe mohãbubo tuu rarekre. Ibutumy dori wytese-wana roire. ²⁴Tai thahe Jesuisi tamyreny rarybere: —Kaki kaiboho teòsamy toite aõma ritina teeryõtenyteki. Tule Deuxururu teeryõteny. ²⁵Ixixanau heka moõ roiõtyhy. Ibutumy iny jyu wese rarekre biu bede-txi. ²⁶Kaiboho aõbo tatyryritinytenyõta iny rubu-ribi kedexixakremy. Kia heka raritinyrỹre Moisesi tyryti-ki, òwòrusõmo ijy-ki rỹimyhỹ. Iwese Deuxu rarybere Moisesi-ò: —Jiarỹ heka Abraõ Deuxu rare. Ijai Deuxu rare. Ijaò Deuxu jiarỹ rare. ²⁷Jiarỹ heka rubu mahãdu Deuxu aõkõ rare, thahe iru mahãdu Deuxu jiarỹ rare. Kaiboho teòsamy toite.

²⁸Bede ywina erydÿÿ mahãduõ nade ijohonamy. Tahe tiiboho widee rarybereny roholareu, Jesuisi tamyreny rirawyõnywihikÿreu, tahe tii Jesuisi-ò ritÿÿraxinyre: —Tibo rybe bede ywina juhuure. ²⁹Jesuisi rirawyõnyre: —Ka heka juhu ludu rare: —Boholake Israeli mahãdu, judeu ijoi mahãdu wahe. Wanyrÿ, iny Deuxu sohojile rare. ³⁰Kia aDeuxu luuke ibutummy awo-ribi, aumtytytyby-ribi, ibutummy aruru-ribi. ³¹Ka heka ihewo ludu rare: —Kai abireluduluuke iwese ixiluuke wese. Ijõ bede ywina heka ka ratyreõre. ³²Tahe Bede ywina erydÿÿ mahãduõ rarybere: —Inatyhymy kai tarybeta. Deuxu heka sohojile ratximyhÿre. ³³Ibutummy awo-ribi iluukemy. Ibutummy aruru-wana iluukemy. Tule ibutummy aeryna-wana iluukemy. Iwese kai ixiluure wese, abire ludu mahãdu luukemy. Kia heka ibutummy irõduxiwelloo ratyre rare. Ibutummy wahidÿÿnaloodÿÿna ratyre rare. ³⁴Jesuisi rieryre kia hãbu rirawyõnywihikÿre tai tamy rarybere: —Kai heka Deuxu lõlõna-ribi irehemy aõkõ. Tai tahe ibutummy ilau ruberure tÿÿraxidÿÿki.

³⁵Jesuisi dohodÿÿna heto-ki rierynanymyhÿreu, rarybere: —Timybo Bede ywina erydÿÿ mahãdu rarybemyhÿre Kristu Davi riõre raremy. ³⁶Davi rarybere aõmybo Deuxu Tyytybytyhy tamy narybedemy: —Wanyrÿ rarybere Wanyrÿ-ò: —Bodony warurunawe-ribi. Txiohe rare, aõludu awarawo-txi aritidikre. ³⁷Tahe Davile Wanyrÿ rininire. Timybo tahe Davi iriõremykre. Tahe iny sõwemy deysana-di roholarenre.

³⁸Tii rierynamyhÿreu, rarybera: —Bexiemyhÿbeny bede ywina erydÿÿ mahãdu lau. Tiiboho heka tyrehe-di riraluurenre. Tiiboho heka rybedÿÿluurenre hãwãhãkÿ riranaki. ³⁹Dohodÿÿna heto-ki juhuryana luurenre. Tule ta anarÿÿ rÿiwana, juhu ryanadile tamyreny awire. ⁴⁰Tiiboho tule wytese urimynydu aõna aõna ritarenre. Ixitõedÿÿna rehehekÿ rexitõenymyhÿrenre. Tiiboho heka aõnihikÿmy aõhõkÿmy dÿÿnana riõwynyrenykre.

⁴¹Jesuisi retehemy rÿimyhÿ dohodÿÿna heto nieruhyna ratya-txi. Tii retehere timybo iny sõwemy tanieru-di tamy rehumyhÿ. Tahe ityhynihikÿ tamy sõwemy nieru-di rehure. ⁴²Tahe nade wytese iaõkõdu mahãduõ tii rare. Tii inatxi nieru sõmo-di rehure. Tanieru tahe nierukonana rare. ⁴³Jesuisi ryryre taerydÿÿna-ò: —Inatyhymy adee araybekre. Kowa heka wytese nieru-di rehure ibutummy iny wixira ratyre. ⁴⁴Kaa mahãdu ibutummy nieru-di rehure rauhenyredile. Tahe wytese idi rehure ibutummy tanieru-di rexihumy taumy-ribi idi rehure.

13 ¹Dohodÿÿna heto-ribi rõhõnyreu, ierydÿÿna tamy rarybere: —Erydÿÿdu, beteheke inihe mana nihikÿ-ò, hetohokÿ-ò. ²Jesuisi rirawyõnyre rarybere: —Kaiboho betehebemykre heto nihikÿ-ò. Kia heka mana ijõ wityre-ki rÿiõtyhy, ibutummy heka kedejuxunykre.

³Oliveira bederatõhõkÿ-ki tii ronyreu dohodÿÿna hetoko-txi, tahe Pedro, Txiau, Joaõ, ibutummy tamy doide rÿÿraximy iny-ribi irehemy. ⁴Wakoreny bedelyke, tiubo kia kÿnyikre. Ibutummy aõna aõna kÿnyikre wana tibo iny bedeenyrenykre. ⁵Jesuisi rexiranyre tamyreny rarybere: —Kaiboho anaitxenanydenyheny lau bexiebenyke. ⁶Sõwemy dori roikre wanimy rarybemy rarekre: —Jiarÿ dori Kristu rare. Tahe iny sõwemy anaitxenanykre. ⁷Kaiboho wounarybe-ò,

aõbinarybe-ò, boholakreu, breburenyõmykre. Kia heka kanakremy ratximyhÿre. Urile bededÿÿnana ikonanamy aõkõhyylemyhÿre. ⁸Uritere inylahinareny, ijõlahinareny-wana wii kidiaõbinanykre. Tule iòlõna mahãdu ijõ iòlõna mahãdu-wana wii kidiaõbinanykre. Bede bedesu ijõ hãwã-ki kanamyatakre. Tahe aõkõre rama kedeakre. Kia heka juhu aõhõkÿmydÿÿnana rarekre.

⁹Kai beziek्रे anamydenyheny lau. Tiiboho anawahinydenykre aòludu wedu-ò, iòlò-ò. Tiiboho anahatenydenykre dohodÿÿna hetowo-ki. Kiabohoko-txi wadee kaiboho kedelyykre inatyhymy aõna aõna rÿiremy. ¹⁰Rybewihikÿ juhuu ibutumy bede hãwã hãwã-ò kiditynydÿÿnykre. ¹¹Tiubo aradyrenykeu, urile nohõtìõmy aõbo kaiboho marybebenykre. Kiautyhyle aõmybo rarybekremy bierykre. Kia tahe marybekre. Kai dori aõkõ tarybemahãte, Deuxu Tyytybytyhy tahe rarybemyhÿre. ¹²Seriõre seriõrele wii kidirubunykre. Tyby heka tariõre kidirubunykre. Uladule tadi, tyby kidirubunykre. ¹³Ibutumy heka iny iy kedeakre wani òraru-ki. Kia heka ikonana-ò rijjekre, taumy tarasanakre.

¹⁴Aõna aõna binahakÿ kanakreu, ibutumy rahukemy. Tiiboho kanakeu itxinonana-txi aõkõ rarekemy, kaiboho mahenybenykre bederatòdhòkÿ-ò, Judeia hãwã hãwã-ki ratxikeki, mahenybenykre. ¹⁵Inyõ hetotyre-ki ratxikeki, urile ròteõmy aõna aõna wydysymy. ¹⁶Inyõ bedero-ki ratxirekeki, uritere òkeseõmy tyy òrysymy. ¹⁷Kobexe heny hãwyy bòtõmy rÿira, tule hãwyy tariõre ritõnymy rÿira. ¹⁸Bexitõenykre kia kanaheny bededÿÿnana sirau. ¹⁹Aõhõkÿmydÿÿnana kanakre tiu heka tuuõre. Juhule Deuxu bede riwinyreule wiji tuu yrubule bede roimyhÿre. Tiu heka kiamy bede roiõtyhy aõhõkÿmydÿÿnanamy. ²⁰Deuxu bede iòhõmy rirawetyòròkeki, moheka irumy ròhõnyõtyhy. ²¹Inyõ adee rarybekeki: —Kaki heka Kristu ratxireri. Kowa-ki ratxireri. Uritere ityhydÿÿõmy. ²²Sõwemy Kristu kanakre, urile Kristu inatyhy aõkõ rarekre. Tule Deuxu rybedÿÿdu kanakre. Kia Deuxu rybedÿÿdu inatyhy aõkõ rarekre. Tiiboho heka bededõby riwinykre tule bede eryna. Deuxu hõrõ riitxenanykemy inatyhymy kõaõboka. ²³Kaiboho warybe biyrubunykre. Adee ibutumy juhuule reòbitinyre.

²⁴Idi webòhõna rÿira txuu, aõhõkÿmydÿÿnana itue-di, txuu heka rurunykre. Ahãdu tule rurunykre.

²⁵Taina heka kedexunykre biu-ribi. Biururu raòweòwenykre.

²⁶Iny retehek्रे Deuxu Riõre dehemynyna-di. Biurawetyky-ribi kodobehek्रे. Kia heka lobixina kanabòtòranykre. ²⁷Tahe taÿju kiditeònykre tawedu ijoihõrõ butudÿÿmy.

Kidibutunykre ibutu bede bede konana-ribi, tule ibutu biukonana-ribi.

²⁸Tahe figueira òwòru-ribi erydÿÿna bierybenykre. Tahe iruru raixinykreu tahe, txiru ròhõnykreu, tai tahe bierybenykre wyra iòhòreri. ²⁹Tule kia aõna aõnamy bobibenykreu, tii iòhòlereri. Ijòkile wese nyide. ³⁰Inatyhymy adee ararybekre, kia wijinabòdu itueõtyhy aõna aõna rÿikre hãrele. ³¹Biu, bede-wana ituekre, tahe warybe itueõtyhy. ³²Moõ heka rieryõtyhy tiubededÿÿnanamybo tii kòdòòsek्रे. Tule ÿju biutxile rieryõre. Tule iriõre rieryõre. Tule tyby sohojile rierye.

³³Kaiboho bexieke, beteheke. Kai dori teeryōtenyete tiubededỹnanamybo kòdòðsekre. ³⁴Kedehemynykre dori iwese hābu tỹimy rarewese tii rexitareu, ririre tadeòdu. Tadeòdulemy tule ridyre itxeredu rethemyhỹkemy. ³⁵Tahe betehe inihe teeryōteri dori tiubo kanakre heto wedu, txioromy ada ruwetya aōbo, ada hānie hābu rryry-di aōbo, ada txумы aōbo. ³⁶Betehe inihe iny araraòòlemy tii rehemynyreteri aki rahakre atỹi-ò. ³⁷Aōna aōnamy jiarỹ rarybemyhỹre, rarybera ibutu-ò: —Biijebeny.

14 ¹Kia-ribi inatxi txумы riuhenyemy ratxireri anarỹỹ kodohònykre. Kia anarỹỹ wehityhynamy heka iny ratya-di reare. Tule orotxu anarỹỹ kia ròhònyre. Tule Deuxu aòmỹsỹdỹỹdu wedu mahādu tule bede erydỹỹdu mahādu Jesuisi rimykemy ratxireri idi rirubunykemy. ²Tiiboho rarybemyhỹrenyre: —Kiahe aòkòre anarỹỹ rỹireriu, iny sòwemy inydeereny kana aòbinanyheny.

³Jesuisi Betỹnia hāwā-ki ratximyhỹu, Simaò tyybina heto-ki ratximyhỹre. Jesuisi òwòru besedỹỹbire-ki roimyhỹ. Tahe hāwyy aderòna òwynihikỹ-di lỹnyrena wihikỹ-di nade. Tai ihyna riwebòhònyra tahe Jesuisi ratityre-ò ritxiwira. ⁴Inyòreny rexiykaranyke. Tahe widee rarybera: —Aòherekibo aderòna rahura. ⁵Inywitzira tahe iòwynykwewi sòwemy nierumy kia-ò. Kia nieru-di tahe iny aòkòdu-ò rawahidỹỹnykre. Tahe tiiboho rexibynyreri hāwyy dee. ⁶Tahe Jesuisi rarybere: —Txiòhe rare, uritere ixibydỹỹòmyke. Tii heka aòwihikỹbo wadee riwinyra. ⁷Kiamy aōu aōu iny aòkòdu rỹikremy. Aòule heka tamy aòwihikỹ biwinybenyke. Jiarỹ tahe, aki aōu aōu aòkòlekre. ⁸Tii heka rexikonananamy ròwidỹỹre. Aderòna-di watyre ritxiwire wabede-ò jiarỹ raòule. ⁹Inatyhymy adeereny ararybekre. Aòtxile Deuxu Rybewihikỹ iny relyyke. Kia-ò kahāwyy ijyymy relyyke, ibutumy iny idi ròhòtinykre aōbo riwinyredi.

¹⁰Tahe Judasi Isariò Deuxu aòmỹsỹdỹỹdu-ò rara Jesuisi tamy rawahidỹỹkemy. ¹¹Tiiboho tamy roholarenyre, reysare. Tahe tamy nieru riwahinykemy riurenanyre. Tahe Judasi riijemyhỹre aōu aōu bedewihikỹ tamyreny riwahidỹỹnykemy.

¹²Juhu orotxu anarỹỹtxure budoeni xiweloo rirubuny rahudi tahe Jesuisi erydỹỹna mahādu tamy rarybere: —Titxibo anarỹỹ rỹsỹnamy biroxikemy atxiteri. Jiarỹboho kowa-ò aroikre. ¹³Tahe Jesuisi tamy rarybere: —Kaiboho boikre hāwāhākỹ-ò. Tahe hābu-wana wii biòbinykre butxi-di riwyreriò. Tahe tii biheludunyenye. ¹⁴Aòtxile hetoò-txi ralòke, kaiboho marybebenyke hetowedu-ò: —Waerydỹỹdu rarybera: —Titxiwexe anarỹỹ rỹsỹna arirỹsỹkre waerydỹỹna-wana. ¹⁵Tii heka adee kiditeòsinykre hetowowitxiraò biu-txi. Ibutumy rexihumy rỹire inydeereny. Kowa rỹsỹna inydeereny biwinykre. ¹⁶Tahe ierydỹỹna rexitare. Roire hāwāhākỹ-ò. Tahe ròhònyre iwese Jesuisi relyyre wese. Tahe ibutumy rexihurenyre anarỹỹ-ò.

¹⁷Txiorou Jesuisi nade taerydỹỹna waòinatxi reurò-wana. ¹⁸Tiiboho òworubesedỹỹ riroximahāu, Jesuisi rarybere: —Kaiboho wawana teroxitenyteri sohojiò biwawahinykre. ¹⁹Tahe urihimyò rexiranyre rabadewomy. Tahe widee raryberenyre: —Jiarỹle heka ariwahinykre.

²⁰Tii rirawyònyre: —Kaiboho, waðinatxi reurð mahādu sohojið. Kia mahāduð orotxu-di wawana rebenymyhy besero-ki. ²¹Inatyhymy Deuxu Riðre Hābutyhyhykỹ rakre iwese iritina rỹirewesele. Kobexeheny kowa hābu heka kidiwahinykre. Tamy iny awire kedeaðlede.

²²Tiiboho riroxireriu, Jesuisi orotxu rimyre, raorore, rexitðenyre, tahe tamyreny riwahinyre. Rarybere: —Āhāxe, kia heka waumy wese rare.

²³Tahe viĩhynamona rimyre, rexitðenyre, tahe tamyreny riwahinyre. Ibutumy ibute bute iribi tuu riðenyre. ²⁴Tamyreny rarybere: —Kia wāhālubu wese rare. Kia hālubu heka rybe tỹmyra ywidỹyna hālubu rare. Kia inyboho kidinohõtijuadenykre. Wahālubu heka kedejuxunykre iny rabðrònihikỹ dee. ²⁵Inatyhymy ararybekre: —Ariðõtthy heka òtetibederatyruibe tỹmyra ihyy tahe tiutxumybo Deuxu Iðlòna-ki ariðkre.

²⁶Deuxuwimy rawinyrenyre, tahe rexitarenyre Oliveira bederatððhòkỹ-ð.

²⁷Jesuisi tamyreny rarybere: —Kaiboho ibutumy wijirumy biwaribenykre. Kia heka iritina rỹire.

Itxeredu tahe rirðrenykeki, budoeni rahenykre.

²⁸Tahe rubu-ribi adexiakre, arakre akomy Kalileia-ð. ²⁹Pedro rarybera Jesuisi-ð: —Ibutumy ararikeki, arariðthy. ³⁰Jesuisi tamy rarybera: —Inatyhymy ararybekre. Wijirumy hāniehābu inatxi kydrykreule, kai iny wixira-ð biwatxiðnykre inatað bedemy. ³¹Tahe Pedro rarybera tarurutyhymy: —Aðkøre, aratxiðnyðthy, ihārele tahe awanale arurukre. Ijð mahādu tule kia wese rarybera.

³²Tahe roire Kesemani hāwāmy ninadu-ð. Taeryðỹyna-ð rarybera: —Biwaraðmy bonykre kakile. Kowa-ð arexitðenykre. ³³Tii ridyrenyre Pedro, Txiau, Joað-wana. Jesuisi rexiranyre rabadewomy ihyy rexitðenyre. ³⁴Tahe tamy rarybera: —Watyytyby heka rabadewomy ratxireri rubuhyy-ð. Kaki bonykre bijjemy. ³⁵Tahe iko-txi urihimyo rareu, resere. Rexitðenyre: —Waha, adee arexitðenykre. Adee awikeki, kia òraule tiu waròeona. ³⁶Tii rarybere: —Waha, adee ibutumy isiraðre. Kia bemona inyhe waròbi bitake inihe. Tahe wadeewi wadeewi-ki aðkò watxireri, tahe adeewi-ki. ³⁷Tii rehemnyre tai rahare rðrðrenymy roirerið. Rarybere Pedro-ð: —Simað, Taròteri aðbo. Bijjeðthy sohoji òramy bededỹynana. ³⁸Bijjebenykre, bexitðenykre, uritere rutaanamy ròteðmykre inatyhymy atyytyby irurudire tahe ade iruruðre. ³⁹Tahe Jesuisi ixityre rare rexitðenyre ixiwesele. ⁴⁰Rððsereu, ijð-ki rahare rðrðmy ixiwesele, irurureny rautxienymyhy dori. Tiiboho rierykøre idi rirawyònyrenyre. ⁴¹Tahe ixbyle rððsere tahe rarybere: —Moròbeny bexielehnybeny. Òra iðhòreri. Kia heka Deuxu Riðre Hābutyhyhykỹ kanawahidỹykre òrarudu mahādu-ð. ⁴²Bitỹmnybenyke, rokoireny, walòsedỹydu iðhðmy rareri.

⁴³Tii rarybereriu, aðwesele Judasi nade. Kia heka waðinatxi reurð mahāduð rare. Tii-wana doide hābu mahādu mayrehe-di, òhòtemy debòna. Kia heka hābu mahādu doide matuari mahādu-ribi, Bede ywina eryðỹ mahādu-ribi, Deuxu aðmysðỹydu wedu-ribi. ⁴⁴Lòsedu tamyreny juhūu bede

eryna riwahinyre. Kawese heka rarybere: —Kowa heka inyõ-ò aruwokre, tii heka hãbu rare. Bimybenykre, birarenybenywihiikÿkre. ⁴⁵Judasi rehemyrenyreu, tahe rarybere: —Wedu, wedu. Tahe tamy ruwore. ⁴⁶Juda ijoi Jesuisi rimyra. ⁴⁷Kia ijoiõ mayrehe ritare tahe Deuxu aõmysÿdÿÿdu wedu deõdu nohõti riorore. ⁴⁸Tahe Jesuisi dirawyõnyde: —Kaiboho mayrehe-di tiwaðrynyteri wasidu-wesemy aõmy, ðhõte-di. ⁴⁹Jiarÿ tahe dohodÿÿna heto-ki watximyhÿ txuõ txuõlemy adeereny araerynanywãhãdenyde. Kowa-ki heka tiwamyõlemyhÿtenyde. Tahe aõbo iritina-ki rÿireri, kia heka kÿnyikremy. ⁵⁰Ibutumy ierydÿÿna mahãdu ririrenre, rihenyrenre.

⁵¹Kia heka hãbuõ riheludunymyhÿ tyy tayredile rexityynymy tiiboho ridyrenre. ⁵²Tii tahe tyy ririre tahe rahenyre tadelemy.

⁵³Deuxu aõmysÿdÿÿdu wedu-ò tiiboho Jesuisi ridyre. Bede ywina erydÿÿ mahãdu, matuari mahãdu-wana ributunre. ⁵⁴Pedro riheludunre irehetyhytyhymy. Rehemyre Deuxu aõmysÿdÿÿdu wedu heto-ò. Tai tahe ixitõtenymy heõtywera-ò rorukumyhÿ heto itxeredu mahãdu-wana. ⁵⁵Deuxu aõmysÿdÿÿdu mahãdu wedu, tule dohodÿÿdu mahãdu alobixidu riijemyhÿre aõlemy Jesuisi ðludu relyymyhÿre, Kia ðraru-ki rirubunrenykeny. Rahaõre. ⁵⁶Sõwemy iny ruimy relyymy rÿimyhÿ. Iruinareny wiribi hitxi hitxilera. ⁵⁷Ijõ mahãdu rÿimyhÿre relyyrehãre ruimy rarybere: ⁵⁸—Inyboho irybe-ò roholarenymy: Jiarÿ heka dohodÿÿna heto ariixãwididÿÿnykre kia heka hãbu iwidÿÿna rare. Txu inataõ-di ijõ ariwinykre iwidÿÿnaweseõre. ⁵⁹Kia heka aõmybo tuu relyyrenyremy irybe wiribi hitxi hitxire. ⁶⁰Deuxu aõmysÿdÿÿdu mahãdu rÿire insõwetya-txi. Tii Jesuisi ritÿÿraxinyre: —Kai aõbo biwarawyõnykre aõmybo relyyrenyneri adee ðludumy. ⁶¹Tii rerawyõnyõlere ixby tahe Deuxu aõmysÿdÿÿdu mahãdu ritÿÿraxinyre: —Kai aõbo Kristu tate, Deuxu wityhy riõre. ⁶²Jesuisi rarybera: —Jiarÿ heka. Kaiboho betehebenykre

Deuxu Riõre Hãbutyhyhykÿ Deuxu rurunaweribi-ò ronyneri. Kaiboho tii betehebenykre Deuxu Riõre Hãbutyhyhykÿ biuwetyky-ribi naderi. ⁶³Deuxu aõmysÿdÿÿdu wedu ityy riykara idi rarybera: —Aõherekibo ijõ alobixidumy iny rururenryeri. ⁶⁴Kaiboho taholatenyta aõbina binalemy rarybereriõ aõmybohe kaiboho tahõtinyinmyhÿtenyde. Ibutumy heka tawo riraõhõrenyru rubudukremy. ⁶⁵Tahe ijõ ityre rybeximy rarutaara rexiruehetynre tahe tule rihetenre. Tahe rarybere: —Mota làhã arahãtenyru. Idi tahe heto itxeredu tule rihetenre.

⁶⁶Pedro heka ratximyhÿ bedeube-ki tahe ijadõma dehemynde, Deuxu aõmysÿdÿÿdu deõdu. ⁶⁷Pedro rexitõtenymyhÿ heõtywera-ò tahe ijadõma tamy retehere. Tahe rarybera: —Kai tule Jesuisi Nazare ludu-wana atximahãte. ⁶⁸Tahe tii rexitxiõnyre: —Jiarÿ reeryõre aõmybo kai tarybeteri. Tahe Pedro hetowo-ribi rõhõnyre. ⁶⁹Ijadõma ixby ixby itxeremy rarybere kowa ijoi-ò: —Kowa heka tii mahãduõ rare. ⁷⁰Tahe tii ixityre rexitxiõnyre. Ixybyle kowa ijoiõ Pedro-ò rarybera: —Inatyhymy kai ijõ mahãduõle tate. Kai dori Kalileia mahãdu tate. ⁷¹Tii inatyhytyhyrybemy rarybera: —Jiarÿ reerykõre hãbumy tarybetenyteri.

⁷² Tahe hãnie hãbu ryryra, inatxi hewoludumy. Ta Jesuisi rybe-txi Pedro tãhõti reare. Iwese Jesuisi rarybere: —Inatxi hãnie ryrykredi, ihewoludukomy ryrykre, wadee bedexitxiõnykre inataõmy. Pedro tahe iribi rexitareu, rahinyre.

15 ¹ Txuu reareu, Deuxu aõmysÿdÿÿdu wedu, matuari mahãdu, Bede ywina erydÿÿ mahãdu ibutumy ributumy. Tahe Jesuisi ritaataare tahe ridyrenyre Pilato-ò. ² Pilato Jesuisi-ò ritÿÿraxinyre: —Kai aõbo judeu iòlò tate. Tii rirawyõnyre: —Kai ka tuu tarybeta. ³ Deuxu aõmysÿdÿÿdu mahãdu wedu rarybere Jesuisi aõna aõna awimya aõkõ riwinyre. Tahe Jesuisi riwawyõnyõhyylere. ⁴ Pilato ixbylye rÿÿraxire: —Kai birawyõnyõtyhy aõbo. Kai aõbo taholaleteri aõmybo tiibocho autedé-ò raryberenyre. ⁵ Tahe Jesuisi rarybeõhyylere tahe Pilato urile bede riõtiinymyhyre.

⁶ Kia heka juhuy iny deõwarixina rare hãbu ròteduõ ritakemy anarÿÿtxuu. Aõtxile iny tamy rexitõenyke. ⁷ Rõtenawo-ki raremyhÿ inyõ Barabamy ninadu-ki. Tii tahe inywitxira aõbinadu mahãdu-wana ratximyhy. Kiamy inydinodu òraru-ki aõbina rÿireki, tii iny rirubunyre. ⁸ Iny sõwehekÿky-ki doide, tahe rexiranyre ixitõedÿÿmy: iny deõwarixina kòdòhõnykre. ⁹ Pilato dirawyõnyde: —Adeereny ariòlòdÿÿnykekõ aõbo ka judeu iòlò. ¹⁰ Tii rieryre dori Deuxu aõmysÿdÿÿdu mahãdu wedu tamy Jesuisi ridyrenyre iwobinanareny lau. ¹¹ Deuxu aõmysÿdÿÿdu wedu inysõwe riixitõedÿÿnyre Baraba riòlòdÿÿnykemy. ¹² Pilato ritÿÿraxinyre ixbylye: —Aõhebo tahe idi arotÿÿnykre. Kaibocho tuu teninimyhÿtenyete judeu iòlõmy. ¹³ Tiibocho rirajuarenyre: —Bitamadÿÿnyke itxeò nihikÿ-ò. ¹⁴ Ta Pilato tamyreny ritÿÿraxinyre: —Aõbina taka riwinyre. Aõhe-wana ixityre rirajuamyhÿrenyre: —Bitamadÿÿnyke itxeònihikÿ-ò. ¹⁵ Pilato inydee aõ riwahinykemy rõhõtynra, tai ta Baraba riòlòdÿÿnyre. Idi tahe Jesuisi riyhytanymy rahudi, riteõnyre itxeònihikÿ-ò riukòrenykemy.

¹⁶ Soldado ridyrenyre heto woube-ò. Tai tahe ibutumy soldado ributumy. ¹⁷ Tahe tyysòborehekÿ-di ritynyrenyre. Tahe ede rataana ritidire ira-ò. ¹⁸ Tahe rirybenyrenyre: —Adee nihikÿre judeu iòlò. ¹⁹ Tahe rihetenyre bòtòre-di irati-ò, tahe ityre rarybexinyre tahe rÿire tatiowotimya rityhynkemy. ²⁰ Tahe tyysòbore iribi ritara, tahe ityyle tamy ritidira. Inatyhymy ridyrenyre itxeònihikÿ-ò riukòrenykemy.

²¹ Kowa-di rekoarenyre hãbuõ. Simaõ Sireni inire. Kia heka Alexÿdre, Rufu-wana tyby rare. Tii nade bedero-ribi. Tiibocho tahe riitxyydÿÿnyre itxeò-di retyykemy.

²² Riwyrenyre bederahy-ò Kòkòta ninadu-ò. Kia heka iwitxira rybe rare. Kia heka rubu ratitybyho wese rare. ²³ Tiibocho vÿi riurinyre òwòruburu-wana. Tahe tii tuu riòõlera. ²⁴ Itxeònihikÿ-ò raukòrenymy rahudi tahe ityy wirarea riatyre, tahe ityy-di rarudeòsanyre tibo iny sohoji sohoji ityy riwykemy. ²⁵ Biurasò txu Jesuisi itxeò-ki raukore. ²⁶ Iratya-ki tahe ritina rÿire: JUDEU IÒLÒ. Kia heka iny tuu rarybemyhÿrenyre. ²⁷ Tahe tii-wana inatxi wasidu itxeònihikÿ-ò riherinanyre, ijõ ruruweribi-ò, ijõ hyweweribi-ò. ²⁸ Tahe rotÿÿnyre aõbo Deuxu ritina-ki rÿire wese: Tii ratximyhy òrarudu mahãdu-wana. ²⁹ Iny reareare

tara riohowimy rarybere aõbina binamy: —Kobe, kai korihe dohodÿÿna heto biatykemy inataõ txudile tahe ixityre bidiwinykre. ³⁰Kaile inyhe bexitakre itxeò-ribi. ³¹Iwesehyyle Deuxu aõmysÿdÿÿdu wedu, bede ywina erydÿÿ mahãdu-wana widee raryberenyre. Jesusinimy raujõmorenyreri: —Tii iny wixira ritare, tiile tahe rextaõtyhy. ³²Kristu, judeu Iðlò, bodobeheke itxeò-ribi jiarÿboho arobirenykremy, tai tahe aratyhynyrenykre. Tule wasidu tii-wana raukðrenyire itxeò-ki Jesusimy raujõmorenyre.

³³Txutyeyu ibutumy bede rurunyre. Tahe roire txu kaò resemy. ³⁴Kiaule tahe Jesusi rarybeterenyre: —Elði, Elði, lema sabatani. Kia heka iwixira tybe rare. Kia rare: —WaDeuxu waDeuxu, aõherekibo kai tiwarite. ³⁵Ijoiõ heka tamy roholareu, rarybere: —Tii heka Eliasi-ò rryreri. ³⁶Hãbuõ reare bexi ritÿxinyre vÿi juberere-di idi tahe ritidire tabòtorejura-ò. Riwahinyre Jesusi ritðkemy. Tahe rarybere: —Deinyhe tamy inyhe reketehereny Eliasi kanakremy aõbo inyhe itarasamy. ³⁷Jesuisi rryre irariemy idi rurure. ³⁸Dohodÿÿna hetowetyy raykare inatxi weryna tyymy, biu-ribi, bede-ò. ³⁹Soldado dinodu Jesusiko-txi ratximyhÿre. Tahe rurureu, irubumy robire. Tahe rarybere: —Ka heka inatyhmy Deuxu riðre rare. ⁴⁰Tule hãwy mahãduõ retehemy rÿimyhÿ irehe-ribi, tõwysyreny-ki, Marie Madalena, Marie (Txiause, Jyrese tii rare. Txiau heka Jyje hewoludumy rare.) Salome tule ihÿre ijõ-wana. ⁴¹Kia heka Jesusi Kalileia raremyhÿu, tiiboho tahe sòwemy iny-wana doide Jerusalê-ò.

⁴²Txioromyhe dehemynyde. Wirareasanatxu rare. Kia heka sabadotxukokile rare. ⁴³Jyje Arimatea hãwã ludu dohodÿÿdu nihikÿò rare. Tule heka tii riraõmy ratximyhÿ Deuxu Iðlõna. Tii ruberuõlemy rare Pilato-ò Jesusiumymy ixitòedÿÿmy. ⁴⁴Pilato rabedeòtiidÿÿnanyre Jesusi rurumy roimyhÿdi tai rryre soldado dinodu-ò. Tai Pilato ritÿÿraxinyre, Jesusi rurumy roimyhÿdi. ⁴⁵Soldado rarybereu Jesusi rurumy roiremy tahe Pilato riteðnyre Jesusiumy Jyje-ò iwahidÿÿmy, ⁴⁶Jyje ritare itxeònihikÿ-ribi tahe ritÿtenyry tyurahãkÿ-di. Idi tahe ritidirenyre mana hãloo wabedewo-ò. Tahe mananihikÿ-di riijòtòbònyra. ⁴⁷Marie Madalena, ijõ Marie Jyrese reteherenyre titxibo tii ritidirenyreò.

16 ¹ Tahe nobiutxu, Marie Madalena, ijõ Marie-wana ihewoludu Marie, Txiause, Salomese-wana rare. Tiiboho lÿnyrena riõbranyrenyryre. Tahe roire Jesusibymy idi rekoakremy lÿnyrena-di. ² Juhutxu semana bededÿÿnanau txuu deadeule roire wabede-ò. ³ Widee raryberenyre: —Mowexe mana ritakre ijò-ribi. ⁴ Tahe tuu robirenyre. Mana nihikÿ ritamy rÿire. ⁵ Wabede-ò rirònyrenyryre, robirenyry weryrybòweselemy rononymhÿ ruruweribi-ò. Ityy urahãkÿmy rononymhÿ. Tahe tiiboho bede riòtiinyrenyryre ruberurenymy. ⁶ Tii tamyreny rarybera: —Uritere breburenyõmy. Kaiboho aõbo teòrytenyryta Jesusi Nazare ludu. Kia itxeò-ki rurure. Tii aõkõ kaki ratxireri. Rexixara rubu-ribi. Betehebeny inihe tai ritidiraò. ⁷ Makre. Marybekre ierydÿÿna-ò tule Pedro-ò. Tii rakre akorenymy Kalileia-ò kaiboho tuu lobiximy boikre tuu adeereny raryberemy. ⁸ Tahe tiiboho rihenyrenyryre wylemy wabede-ribi ruberumy. Tiiboho moõ heka rarybeõhylerenyryre ruberumyhÿrenyky.

⁹Juhutxu semana bededÿñau Jesuisi rubu-ribi rexixare. Idi tahe juhuu àsitereribile rexitÿnnyre Marie Madalena dee. Kia-ribi heka juhuule ritare debò inatxi reurò tyytybybinamy. ¹⁰Tii rare Jesuisi-wana raremyhÿ mahãdu-ò. Tiiboho rabadewomy ratximyhÿreny, rahinymyhÿreny. ¹¹Tamyreny relyyreu iwese Jesuisi tamy rexitÿnnyre wese Jesuisi irulemy ratximyhÿmy tuu robireke, rityhynyõlerenyre.

¹²Jesuisi rexixamy rahudi tahe, iwixiramy rexisÿnnyre inatxi erydÿñna-ò. Tiiboho heka roimyhÿrenyre bedero-ò. ¹³Tahe dòdsede relyyrenyre taijoi-ò, tahe tule rityhynyõlerenyre.

¹⁴Tahe waðsohoji reurò erydÿñna-ò Jesuisi àsitereribile rexitÿnnyre. Tiiboho roximyhÿrenyò rexitÿnnyre. Tahe Jesuisi tamyreny rarybera: —Aõherékibo kaiboho iny wamy robira mahãdu tetyhynyõteri. ¹⁵Kaiboho boibenyke ibutumy bede bede-ò Rybewihikÿ bitÿnnykremy. ¹⁶Inyõ Rybewihikÿ rityhynykeki, idi kidisebenykeki, tii Deuxu ritake. Inyõ rityhynyõkeki, Deuxu ixi-ribi riteònykre iòraru-ki. ¹⁷Kia bede eryna ityhydÿÿdu kidiheludunykre. Tiiboho tyytybybina kiditeònykre wani-ki. Tule heka tiiboho itÿmyra rybe kanarybedenykre.

¹⁸Hemylala rimyrenyreu, aõhe rotÿÿnyõlere tule rubuna monamy riõkeki, rotÿÿnyõlere. Tiiboho tebò ritidirenykre bina mahãdu-ò tahe riteytenykre.

¹⁹Idi tahe Jesuisi tarybe rahuredi, Deuxu ridyre biu-ò. Tahe ronyre Deuxu ruruweribi-ò. ²⁰Tahe tiiboho roire ibutumy bede bedemy tai bede ritÿnnyrenyre. Wanyrÿ riwiðhenanyrenyre tahe bede eryna-di irybe ixidee rimyrenyre ihelududÿÿdu mahãdu-ò.